

萬 有 文 庫

第 二 集 七 百 種

王 雲 五 主 編

明 詩 紀 事

( 六 十 )

陳 田 輯

商 務 印 書 館 發 行

萬有文庫

第二集七百種





商務印書館發行

愛公用  
惜國  
使國  
用書

明詩紀事

(六十)

陳田輯



空軍官學校圖書館

登錄號

414

類號

083.12


7520

I. D. O. C. A. F. C. S. LIB.

1112

~~#810.727 / 7560~~

#811.1046 / 7560



明詩紀事卷十八

戊籤

孔天胤四首

天胤字汝錫汾州人嘉靖壬辰第二人及第授陝西提學僉事歷浙江布政使有文谷集四十四卷

國雅孔方伯詩方之玉琢鼎彝材良器重款識工緻特乏弘綽耳

靜志居詩話管涔山人如新調鸚鵡雖復多言舌音終是木強

田按文谷刻意摹古五律亦自清拔

夏夜永嘉館

下馬送春色。端居延夏陰。流光坐自歎。日暮不成吟。客路連滄海。歸心滿舊林。宵憂何所似。波湧大江深。

石梁

神嶺劃如闢。瓦空橫一梁。虹衢玉京路。煙道羽人鄉。迸水藏金澗。懸蘿暗紫房。尙遲飛錫渡。臨眺佇斜陽。

秋思

國家圖書館



004759339

白露沾野草。商風吹前林。容華忽以改。寒涼時見侵。四運有承謝。平生多苦辛。豈不念時命。積鬱終難任。

歲暮深澤縣作

朔吹動寒館。明暉生薄幃。天空城柝散。夜久客燈微。處世能誰是。孤心乃獨非。長思澤畔侶。捐珮宜言歸。

尹耕六首

耕字子莘。蔚州衛人。嘉靖壬辰進士。以知州罷斥。徵授兵部員外。歷郎中。出爲河間知府。擢河南按察僉事。坐劾戍遼左。有朔野集。

列朝詩集。子莘爲人豪宕不羈。性嗜酒。喜談兵。嘗爲州守。廢免家居。生長邊陲。通知疆事。痛恨武備廢弛。邊臣玩愒。作寒語十篇。申明邊防虜勢之要害。以告當世。作爲歌詩。沈雄歷落。秋興上谷諸篇。有河朔俠烈之風。分宜當國。見而才之。自知州起廢。數月中。遷兵部員外郎中。出知河間府。河間畿輔重地。虜數入犯。募壯士製戎器。旌旗壁壘。爲之一新。吏部希分宜指。稱其知兵。破格改用。擢河南按察司兵備僉事。仍予四品服俸。令管領民兵。朝論譁然。給事中張萬紀抗疏劾奏。上大怒。械繫下獄。雜治遣戍遼左。自是遂終身。屏棄不復用矣。國家急虜附鞬。思將帥之臣。當取文武大略。不應以便文瑣節。繩約捃摭。分宜得君當國。能知子莘。而不能違物議。以收其用。議論多而節目繁。何以羅出羣之材。備羯夷之患耶。

鵓鴿峪

鵓鴿峪。鵓鴿飛。書生畫地談兵機。一身恥潰千重圍。千重圍。戰不止。力漸竭。兮鼓聲死。胡兒馬上羨大刀。南向挪揄齊嚙指。

戰城南

戰城南。鼓聲沸。胡陣如蛇前。最銳。三衝五合。令轉嚴。仰面看天。斜日墜。胡去不苦追。胡來不發矢。大開陣。角臥中軍。凱歌如雷。四壁起。

西城道中短歌

柳條當風戰。猶力桃李無言混。荆棘。桑乾東帶斷。冰流。昨日荒城作寒食。君不見戰士經年挂鐵衣。一身重犯數重圍。紇干山下營初散。牟那峯前檄更飛。年年烽火爲生計。誰道沙場春事稀。

項羽墓

四方爭逐鹿。三戶可亡秦。何事新安卒。同成馬足塵。捐金行反間。撞斗失謀臣。今日留坏土。應慙負劍人。

蔚州歌

南山陡絕石門峪。西嶺斜通亂石灘。敢勇近聞堪一戰。莫教容易近長安。井陘荒城日易曛。阜平山下剩黃雲。羯奴飲馬桑乾水。愁殺關南義勇軍。

許應元十一首

應元、字子春。錢塘人。嘉靖壬辰進士。除泰安知州。改泰州。徵授刑部員外。歷郎中。出爲夔州知府。遷四川按察副使。改廣西進布政使。有隋堂摘稿十六卷。

田按：嘉靖初，薛君采陳約之輩，倡初唐之體，一時七古頗少勁健之篇。隋堂楊參軍歌，聲調頗壯，惜集中此例不可多得耳。五律亦流動自然，詩綜僅錄二篇，不足盡所長也。

讀殷近夫集

殷侯本岸瑋，氣與煙霞親。一朝被組綬，濩落隨風塵。爲吏山水間，給事金馬門。榮遺志乃得，道屈命茲屯。瓌詞發靈性，逸響振青雲。變彼楚執珪，咄咄將誰言。

題畫

楚澤彌煙雨，皋陸湛滄溟。春風被修畹，蘭草擢丹榮。曹署雖局束，書史有餘清。披圖攬英秀，浩蕩江洲情。但恐菘菘滿，涕下還縱橫。

楊參軍歌

楊參軍年向七十，氣薄雲月，請太倉兩斛粟，常持一篇冰雪文。到年虜入右北平，上馬便繫纒胡纓。歷詆燕壘一百二，恨無尺箠笞懦兵。今年僦居水月寺，閉門著書非所志。滿壁滄洲虎頭筆，三足故鼎蝌蚪字。昭王臺前日欲斜，相逢市南酒人家。小僮鼓箏不入耳，春風滿庭吹落花。爾來幾時不相見，玉河水膠道飛霰。屢如東郭有人嗤，賦似長卿無客薦。烈士懷奇祇自奇，肯游鄴下屠沽兒。但令風月且入手，安問公侯能俛眉。君不見荆山峩峩淮水急，風雲瀕洞不可測。虎變龍飛二百年，猶貯英靈產詞客。木門倉琅詎



許攀聊復對酒丹蒼顏。豫章神物身在地。光芒夜夜斗牛間。

獨愁

玄雲荒野盡。白雪古城浮。溟海開三嶠。風煙攬十洲。誅求餘壁立。祿食自身謀。禹貢茫茫蹟。憑高送獨愁。

同蔡行人子木登高里山

杏騎青林盡。登臺翠甸新。雲山存吏隱。詞藻待王人。花日移亭午。蘭風泛早春。遲歸非戀賞。與爾對清真。

題姚大參虛谷卷

傳君棲谷口。一室坐生雲。地迴栽花好。天空落葉聞。閉門漆園吏。開卷冰雪文。應自聲聞遠。還隨鳴鶴羣。

鶴歸亭

丹壑訪茅店。遺蹤閟白雲。竹陰流冉冉。溪水去泔泔。無復鶴歸日。空傳鴻寶文。獨令耽寂意。深覺未離羣。

送翁夢山憲使觀察河南

言辭蜀道險。憑軾向中州。共惜春前別。還登江上樓。曉雲千騎擁。芳樹一樽留。去後知相憶。封題報瀛頭。

送楊主簿之益陽

昔忝名山守。同攀嶽頂雲。竭來二十載。京國再逢君。黃綬仍趨府。青袍動出羣。湘蘭與沅芷。相憶採芳芬。

寄徐承芳

伍公祠下吳峯曲。竹裏新開孺子亭。花徑祇通雙短屐。茆齋唯對一遺經。此時見月殊方色。夢裏羣山故國青。蘆葉雁聲推枕坐。江南山北水冥冥。

送黎松坡闈帥赴尙書幕府兼柬徐見山隱居

詔書新下獎元勳。幕府仍看請護軍。組練朝疑吳地雪。油幢晝引粵溪雲。經冬碧樹工留客。遶舍青山助憶君。寄語南州徐孺子。待予歸伴老松筠。

蔡汝楠十首

汝楠字子木。德清人。嘉靖壬辰進士。除行人。遷刑部員外。改南刑部。出爲歸德知府。改衡州。歷四川副使。江西參政。山東按察使。江西布政使。以右副都御史巡撫河南。召拜兵部侍郎。改南工部。有自知堂集二十四卷。

四庫總目。明史稱汝楠初喜文章。從王慎中。唐順之。高叔嗣。顧璘。皇甫涇兄弟遊。中年後好講學。與鄒守益。羅洪先相善。詩格遂頹唐。頗有壽陵餘子失其故步之譏。然汝楠才地本不足雁行王。唐諸人。亦不盡係於講學之後。荒廢吟詠也。

茅坤白華樓續稿。子木初釋褐。競爲聲詩。然鑿刻藻麗。過南省。則洗去鉛華。合響耶。劉諸大家矣。

藝苑卮言。蔡子木詩。如嬌女織流黃。不知絲理。強自斐然。

國雅。蔡司空子木。聲調淵雅。情興高朗。其集爲用修所選者。爲藝林珍賞。晚歲率易應酬。似出二手。五言云。三江看雁盡。五嶺入雲多。泉落雲中確。溪回樹杪船。疏鐘搖落葉。細雨帶秋蟲。七言云。無復山門訪支遁。獨留徑草待王孫。此例酷似劉長卿。

盛明百家詩。白石訪予獨行園。論詩竟日。深得玄指。然意每不自滿。寄予虛明樓詩云。登高渾漫賦。何意萬人傳。白石詩其可量乎。

列朝詩集。嘉靖初。唐應得。陳約之。反北郡之弊。變爲初唐之體。後乃稍變爲中唐。子木之風調。得之皇甫兄弟。漸摩者居多。田按。子木與皇甫兄弟襟契不淺。子循寄蔡衡州詩云。日日江頭聞送客。空於詩卷恨錢郎。自注云。唐人贈送卷內。以不得錢起。郎士元詩爲憾。予昔與子木在南省時。頗類此。子木哭子安詩云。五字沈吟詩品絕。一官憔悴世途難。時人以爲定論。子木五律頗類皇甫。第才不及耳。

### 鷄鳴寺

龍山開古寺。長傍紫微天。地近多來客。心空不礙禪。虛窗遠岫出。上界一燈燃。落日回廊轉。松關深暮煙。

### 送王生還楚

來預看花候。歸逢度雁時。春風留客久。寒雨獨行遲。煙樹吳關外。鄉園漢水湄。平生楚遊意。因子憶江離。

### 寄題王生艾齋

知爾歸棲處。青山帶急流。看雲江上宅。聽雨竹間樓。憑几開遺帙。鳴絃寫獨愁。美人思報遠。猶及楚蘭秋。

### 題峴山濟公房

禪榻澄湖上。山光似鏡中。疏鐘搖落葉。細雨帶秋蟲。峯竹虛窗映。爐香別院通。何期碧雲合。一酌對休公。

### 自瑞洪沂江入信州

暫得辭文牒。虛窗畫舫開。江趨鄱口落。山向信州來。接樹迷帆入。殘鶯喚夢回。無人共登眺。翹首越王臺。

秋夜寄懷皇甫少玄

湖上楓林露氣清。懷人遙夜月同明。春征忽漫逢秋序。越信何因到楚城。山帶石頭亭嶂出。潮回京口海天平。從來謝眺吟詩地。無限江淹恨別情。

哭皇甫子安

與君闕下共彈冠。翰墨筵中更結歡。五字沈吟詩品絕。一官憔悴世途難。清琴欲鼓含愁斷。短札猶存掩淚看。詞客招魂終渺邈。獨慚作誄似潘安。

芙蓉閣

江東有靈窟。梁代無倦才。空留芙蓉閣。遊客稱蓬萊。

春江詞

溪流清且淺。雲山斷還續。爲唱濯纓歌。聊和江妃曲。

度熊飛嶺

衡南那復見來鴻。嶺路高盤赤石叢。百里連岡山縣小。人家都在夕嵐中。

王梅四首

梅、字時魁。平湖人。嘉靖壬辰進士。選庶吉士。改刑部主事。謫判滁州。有柘湖集。

王文祿文脈。王柘湖詩企盛唐。大復之續也。

野獲篇。平湖王梅。嘉靖壬辰選庶常。初進館。赴閣。試長安新秋感興詩云。鳩鵲樓高灝氣橫。堯章商律又敷榮。六龍扶日明華袞。五鳳驚雲薄太清。西北烽煙新入警。東南民力未忘情。青袍際遇渾無補。退食遲遲愧友生。當時以爲第一。後授官。止得主事。

橋李詩繫。柘湖詩歌。清深老健。迥然塵壘之外。

靜志居詩話。柘湖風神韶亮。得無累之神。絕句小詩尤見清拔。

### 寄石汀王先生二首有引

石汀先生按浙。梅時爲諸生。雅承休盼。斗筲黃鐘。計偕一見。睽離至今。風搖心旌。川回目練。晤言未期。沈憂空積。觸事宜懷。言無倫次。聊軫疇昔。俟諸將來耳。

苦憶王夫子。清時賦考槃。三年不相見。一札阻長安。蘭雪留彤管。雲山照鐵冠。因風泛瑤瑟。情竭賞音難。十年萊子服。數口汝陽田。荷篠深山裏。銜杯曲水前。春蘿搖石月。夕鳥下汀煙。最是論文友。時時詣鄭玄。

### 在滁州與韓侍御魯淙卜築豐山東麓

知爾亨途久息機。不妨高臥共巖扉。山雲半落烏皮几。池月涼分白苧衣。抱病秋來行藥倦。故人天上尺書稀。疏慵自缺經時略。浪說東南有少微。

涼州曲

記得行時約。言從上黨遊。昨傳書信至。三歲在涼州。

程瑤三首

瑤字子彬。德州人。嘉靖壬辰進士。授覃懷推官。累官尙寶寺卿。以忤嚴世蕃左遷。起參政。遷江西布政使。有右丞集。

張九一綠波樓集。右丞近體。本之才情。傳以色澤。颯颯洋洋。復見正始之音。

田同之安德明詩選遺。子彬詩協唐音。尤工五律。

人日辰州道中

旅客逢人日。江關信馬蹏。春光微冉冉。草色已萋萋。驛道通三楚。風煙接五溪。誰能將柏酒。一爲解羈棲。

晚赴宿州

亂山驅獨馬。返照入寒林。重以碧雲合。淒其游子心。疏籬隔吠犬。灌木集鳴禽。獨有孤飛雁。哀鳴意不任。

棧道

地險襟喉會。川流南北分。千峯兼萬壑。匹馬逐孤雲。黑水蛟龍窟。青林虎豹羣。不堪巉絕處。天日又西曛。

趙伊五首

伊字子衡。平湖人。嘉靖壬辰進士。授刑部主事。改南兵部。歷員外郎中。出爲廣西按察副使。有序芳園稿二卷。

田按：子衡初與皇甫子安兄弟。蔡子木、王維楨談詩。及官南郡。與湛甘泉、鄒東廓、羅念菴講學。詩特輕脫。時近宋派。

贈西橋楊君

河橋連草屋。深郭此幽棲。釣艇近門繫。囊琴過客攜。夕陽分遠樹。春水會前溪。老況存詩景。看雲日杖藜。

泛湖

出門理棹卽湖中。竟日淹留興未窮。鏡水已應歸賀老。習池能免醉山公。雨餘江柳迎人綠。秋近園葵對酒紅。朋舊追隨真率在。揮金遠慕二疏風。

次友人秋夜獨坐

莫向浮名問是非。乾坤落落更誰私。爭妍樹木底心性。逐化魚龍自歲時。草閣琴書秋正爽。江城鐘鼓坐來遲。懸知對月忘懷處。風竹蕭蕭入夢思。

夏日偶坐

草色侵階映綠滋。濛濛細雨暮光遲。北牕高枕此何意。新竹過牆還幾枝。杯酒於人休作惡。交遊何處好相宜。湖山見說添形勝。消得閑來兩鬢絲。

和鶴椿移居韻

卜居負郭草堂靜。曲浦石橋何處村。幾箇沙鷗來近渚。一鉤林月挂黃昏。入城小艇省徒步。寄友新詩代面論。七十老翁怡老地。大椿巢鶴子還孫。

錢薇三首

薇字懋垣。海鹽人。嘉靖壬辰進士。除行人。擢禮科給事中。轉右給事中。隆慶初。贈太常少卿。有承啓堂藁二十九卷。

新茶

欲向陽羨游。春雨阻行楫。山僧攜滿籠。門前挂青笠。

贈高卿

澱山湖邊客舫來。尋曲徑煙蘿。風雨連朝離思。一尊子夜吳歌。

庚戌虜警

薊門寒色徹高秋。易水蕭蕭咽不流。聞道北門虛鎖鑰。左賢闌騎下涼州。

吳嶽二首

嶽字汝喬。汶上人。嘉靖壬辰進士。授戶部主事。歷郎中。出爲廬州知府。改保定。歷山西副使。浙江



參政、湖廣按察使、山西布政使、以右僉都御史巡撫保定、改貴州、進左副都御史、協理院事、歷吏部侍郎、遷南禮部尚書、就改吏部、贈太子太保、謚介肅、有望湖遺稿。

海嶽靈秀集、家宰詩、儒逸清灑、入盛唐蹊徑。

### 別二司諸公

寥廓江天遠、淹留畫舫移、離觴催暮景、歸棹劇鄉思、泛梗年來倦、投簪老去遲、憑君一盡興、回首各差池、

### 舟中懷感

百丈牽風上瀨遲、杪秋霜露劇鄉思、蕭條已負黃花節、搖落空看楊柳枝、細雨孤舟還隱几、暮雲寒笛漫傾卮、羈懷正苦未消歇、隔岸誰歌白紵辭、

### 宋衡一首

衡、字士南、萬安人、嘉靖壬辰進士、除尤溪知縣、改婺源、徵授刑部主事、歷郎中、出爲福建提學副使、累官山東布政使、以右副都御史巡撫山東、召拜工部侍郎、進南刑部尚書、改工部、總理河漕、加太子太保、有鍾山集、

### 宿眷野齋偶題

玄皋臨巨壑、危石削層臺、野鳥機都息、寒松手自栽、時因尋藥往、日爲看雲來、向夕春風至、雙扉忽自開、

范欽二首

欽字堯卿。一字安卿。鄞人。嘉靖壬辰進士。除隨州知州。徵授工部員外。出爲袁州知府。遷江西按察副使。累官右副都御史。巡撫南贛。遷兵部侍郎。有天一閣集。

甬上耆舊集。侍郎解組歸。時郡中東沙張公竹墟屠公亦以事廢里居。投閒嘯咏。人稱爲東海三司馬。侍郎居在兩湖深處。舍徑皆曲。林木翳然。性喜藏書。起天一閣。盡購海內異本。列爲四部。與吳門王鳳洲家。歲以書目取較。各鈔所未見相易。故浙東藏書家以范氏天一閣爲第一。

靜志居詩話。堯卿格律自矜。第取材太近。時倡和者沈嘉則。呂中甫諸人。未免聲調似之。

汎東湖

澄波四望空。畫舸泝冷風。野寺輕鷗外。人家細雨中。菰蒲臨水茁。洞壑與天通。卽擬尋真去。花源杳未窮。

懷呂中父上黨

長年依帝子。何似漢枚乘。結客惟三晉。遊人伴五陵。月中催授簡。雪裏罷呼鷹。會念林遊者。風前思不勝。

林應亮一首

應亮字熙載。侯官人。知府春澤子。嘉靖壬辰進士。授禮部主事。歷郎中。出爲常德知府。遷江西副使。歷參政。按察使。布政使。以右副都御史總理河道。進戶部侍郎。總督倉場。有少峯集二卷。

彭城懷古

碣石開重險。江城枕上游。雄圖山北鞏。王業水東流。碧草留侯廟。荒林亞父邱。晚來橫笛起。猶帶楚歌愁。

蘇志皋四首

志皋字德明。固安人。嘉靖壬辰進士。除瀏陽知縣。改進賢。徵授刑部主事。歷員外郎中。出爲廬鳳僉事。歷山西參議。陝西副使。謫河州知州。遷陝西僉事。歷山西副使。陝西參政。山西按察使。進布政使。以僉都御史巡撫遼東。進右副都御史。有寒邨集四卷。

列朝詩集。右都才情富麗。沾沾自喜。好作長短句。

田按。寒邨詩風調自佳。北平詩人品在頓鷗汀之次。

孤雁

寒空一雁度。孤影落橫塘。莫妬隄邊鳥。鴛鴦本自雙。

扁舟圖

蘆花點綴楚山青。江平舟穩夢初醒。浮雲捲盡暮天碧。歸雁數聲秋冥冥。

採蓮曲

彭蠡湖中南顧船。女郎作伴採秋蓮。含羞唯恐傍人見。撐入蘆花洲子邊。

初夏寄題隆興寺禪房

葡萄引蔓棗開花。臺殿參差日影斜。一客不來雙燕落。老僧閒自曬袈裟。

周復俊一首

復俊字子顓。太倉州人。嘉靖壬辰進士。授工部主事。歷員外郎中。出爲四川提學副使。改雲南。歷四川雲南布政使。進南太僕卿。有涇林集八卷。

靜志居詩話。子顓甄綜鄉黨之詩爲玉峯詩纂。而以己詩請楊用修評點。亦稱好事。第諸體多膚淺不足觀。

寒江

千林暝若空。遙峯隱還見。嵐雲凍不飛。江水明素練。

浦應麒一首

應麒字道徵。無錫人。嘉靖壬辰進士。選庶吉士。授編修。進春坊左贊善。有后巖詩藁。

碧山社次答俞廉訪

雨餘新綠布繁陰。旋覺山堂花木深。酒送行廚來畫舫。茗攜僧供出珠林。翠憐湘筍千竿玉。黃惜枇杷一樹金。日午鶯聲嬌百轉。可能無意勸同斟。

顧存仁一首

存仁字伯剛。太倉州人。嘉靖壬辰進士。除餘姚知縣。徵授禮科給事中。以言事廷杖。編管保安。隆

慶初起南通政司參議。遷太僕寺卿。有東白草堂集四卷。

西路出紫荆關

萬山急水度浮圖。名峪胡騎曾茲犯帝都。每飯豈宜忘鉅鹿。防秋先合塞飛狐。雄關虎踞神州迴。羣隘星羅孔道孤。落日獨懸戎馬淚。杞憂誰為達天衢。

包節一首

節字元達。松江華亭籍。嘉興人。嘉靖壬辰進士。授東昌推官。徵授御史。以劾中官廖斌下獄。遣戍莊浪衛。有侍御集六卷。

歲暮詠懷

凜冽歲云暮。逝節何駸駸。幾歷玄冥雪。渺邈天山陰。荷戈未息肩。年鬢日以侵。登城望故鄉。睽隔如商參。援琴欲鼓之。恐使淚沾襟。

白悅一首

悅字貞夫。武進人。嘉靖壬辰進士。除戶部主事。改禮部。歷員外郎中。遷左春坊司直。謫永平通判。歷南後軍都督府經歷。吏部郎中。再謫河間通判。遷戶部主事。改尙寶司丞。出為江西按察僉事。有雒原遺集八卷。

四庫總目悅爲尙書昂之孫家世鼎貴而獨刻意學詩句調華瞻神理頗清視當時襃績者差勝特格律未能變化往往雷同司勳集維原集調暢朗而思沈語婉麗而致遠音和平而易感旨雋永而難斃國雅司直詩如明月等篇出建安風骨兼貞觀思致故宗子相謂總之詩不離唐五言者最乎田按維原詩特俊爽惜不得其全集錄之

臥病官齋懷王江南

春色灑灑滋春愁。夢思故園沙棠舟。三星在戶美人遠。浩月澄河空夜流。燈花照酒獨看劍。短笛吟風誰倚樓。同時相聚不相樂。相思莫漫相悲秋。

謝少南一首

少南字應午。上元人。野全先生承舉子。嘉靖壬辰進士。除南刑部主事。遷春坊司直。歷廣西提學僉事。陝西提學副使。河南參政。終布政使。有河垣稿。謫台稿。粵台稿。

少室赴蒼梧賦贈時有交南之役少室著議及之

最愛平黎策。無論諭蜀文。相如元重漢。馬季故能軍。江外傳烽火。關南結陣雲。誰知樽俎地。制勝萬夫羣。

廖希顏六首

希顏字叔愚。茶陵州人。嘉靖壬辰進士。除高安知縣。遷工部主事。歷郎中。出爲山西提學副使。遷浙江按察使。有思復堂稿四卷。

沅湘耆舊集。叔愚詩才俊。爽評者謂其繼西涯。龍湖而起。殆不誣也。  
田按。叔愚七律氣格軒舉。

訪王吏部北郭園

瀟灑王吏部。好爲人所難。忤俗豈忘世。上書甘罷官。灌園北郭裏。結社龍門灘。一榻青山外。逢人白眼看。  
別郭漸齋

題南山卷應潞邸教

三年爲客向并州。兩見南山屬暮秋。宋玉多愁應有賦。梁王高興幾登樓。爐煙孔雀新屏上。花氣芙蓉別殿頭。今日賡歌樽酒裏。瑤池豈少報應劉。

次韻答澄江憲伯

坐逢伯仲樽常滿。愁入邊關思轉深。白草連天還雪色。黃雲絕塞已秋陰。長裾曳履成何事。尺組丸泥遠寸心。十載自憐通籍早。人前徒解郢中吟。

立夏

灌木陰陰黃鳥嘯。高齋兀坐思淒淒。庭前生筍半成竹。道上飛花盡作泥。人生幾何春又夏。世路那堪東復西。清吟淺酌且自慰。芳草天涯寧久迷。

遊雁宕

中峯石戴七星芒。拄石青藤九尺長。四十八盤天上路。東邊回首是扶桑。

李徵一首

徵字誠之。常德桃源人。嘉靖壬辰進士。累遷禮科給事中。出爲江西按察副使。遷浙江參政。有元光漫稿五卷。

秋夜雨花堂對月

秋月禪心相對清。露華飛墮葛衣輕。爐熏茗椀煙初歇。坐聽遙空雙鶴鳴。

王廷榦一首

廷榦字維楨。涇人。嘉靖壬辰進士。除行人。遷南刑部主事。改戶部。歷員外郎中。出爲九江知府。有巖潭集。

田按。皇甫子循上大司徒書云。廷榦與越郡蔡汝楠並以弱齡。漸翼鴻達。雙曜麗采。馳聲藝苑。雖終賈復作。巖路再生。蔑以加焉。亦友朋假藉之詞耳。今核所作。殊不盡然。



駕出長安

聖后乘時豫，鸞車出漢宮。雕戈明曉日，寶幟拂晴虹。輦轂謳歌起，山川畿甸雄。侍臣徒仰德，拜手奏南風。

沈越一首

越，字中甫，南京錦衣衛人。嘉靖壬辰進士。除羅田知縣，改平江，徵授山東道御史，謫開州通判。歷衛輝推官，德安同知，有麓村詩草、新亭漫稿。

金陵瑣事：沈韓峯越工小令，鐵面御史，能爲風流嫵媚語，賦梅花者，豈獨宋廣平乎。

懷方孔明

梅花吹雨日連牽，綠漲陂塘已拍天。爲念故人生計薄，一篙春水種湖田。

秦鳴夏一首

鳴夏，字子亨，臨海人。嘉靖壬辰進士，選庶吉士，授編修，進中允，以事罷歸，起兵部主事。

送胡龍山別駕

君行不可留，綠柳暗江頭。春色隨征旆，浮雲生暮愁。孤衷懷楚璧，壯志拂吳鉤。湖海他年夢，能忘天姥遊。

姚虞一首

虞，字宗舜，莆田人。嘉靖壬辰進士，官御史，有焚餘詩集。

洗少汾讀書臺

卜築煙霞外。幽棲豈避名。小窗時讀易。竹院每逢僧。倚閣峯相對。當秋月自明。閒雲來洞口。盡日鎖柴扃。

高應冕五首

應冕字文中。仁和人。嘉靖甲午舉人。授綏寧知縣。遷光州知州。有白雲山房集。

國雅。高光洲文中。才致清瞻。聲調適捷。平平寫出。亦自沈淨。如黃鳥歌聲。秦亡自此始。濤捲海門山。雪橫天際鳥。經聲出院少。草色上階多。是中唐語。

田按。文中五字詩。清隱有章。王遺意。歸田後。與閩縣祝汝亨時泰。新安王仲房寅。錢唐方禹績九敘。童仲良漢臣。仁和劉安元子伯。沈懋學仕結社於西湖。曰紫陽湖心。玉岑。飛來。月巖。南屏。紫雲。洞霄。凡八社。今所傳西湖八社詩帖是也。

靈峯寺訪少岳張山人不遇憩聽泉石

山秋鬱蒼蒼。禪林轉幽寂。因躡靈峯雲。偶憩聽泉石。泉流何清冷。石古苔蘚碧。洗心悅真境。松風引孤策。何處覓知音。還候山中客。

憶中峯舊遊寄問賓竹上人

幾年別中峯。羣山宛在目。松濤帶江聲。石門轉谿曲。不知舊遊徑。新長幾竿竹。可有殫霞人。還過白雲宿。

舟宿江口

煙水洞庭秋。蒼茫日沈夕。潮落江聲迴。鳥下雲林急。月高漁未歸。山昏寺鐘寂。獨憐沙上鷗。忘機同野客。

湘潭發舟宿武陵望桃源

解纜浮湘浦。春帆帶晚霞。還隨洞庭水。又宿武陵花。歸夢楚雲斷。聽歌山月斜。桃源空極目。何處是僊家。

同茅鹿門賓山上人雲房晚步

披襟鹿門客。攜手虎谿僧。同步山中月。長吟石上藤。流雲時護竹。宿鳥夜窺燈。萬籟此俱寂。聞鐘去未能。

陳芹二首

芹、字子野。系出交南國王。永樂中避黎氏之亂來奔。家南京。嘉靖甲午舉人。授崇仁教諭。遷奉新知縣。改寧鄉。有子野集、鳳泉堂集。

玉筍詩談。子野爲令九十日。解印歸。卜居鳳凰泉之左。又構別業新林浦。時垂綸其上。浦有橫厓。因自題曰橫厓小隱。又卽邀笛步爲閣其上。云邀笛閣。而引騷人倡詠爲樂。嘗取古高士自巢許而下。迄於宋元。得七十餘人。爲之詩以自見其志。號思古吟。

烏衣佳話。子野墨竹花草。絕無俗氣。文徵仲稱其竹枝清氣逼人。戒門下士到金陵不可畫竹。金陵有人。蓋指子野。

金陵瑣事。橫厓陳子野。書法鍾王。俊逸可愛。

列朝詩集。海宇承平。陪京佳麗。仕宦者誇爲仙都。游談者指爲樂土。弘正之間。顧華玉、王欽佩以文章立埤。徐子仁、陳大聲以詞曲擅場。江山妍淑。士女清華。才俊歛集。風流宏長。嘉靖中年。朱子价、何元朗爲寓公。金在衡、盛仲交爲地主。皇甫子循、黃淳父之流爲旅人。相與授簡分題。徵歌選勝。秦淮一曲。煙水競其風華。桃葉諸姬。梅柳滋其妍翠。此金陵之初盛也。萬歷初年。陳寧鄉子野解組石城。卜居笛步。置驛邀賓。復修青溪之社。於是在衡、仲交以舊老而莅盟。幼于、百穀以勝流而至。止。厥後軒居

紛透唱和頻煩。雖詞章未爛大雅。而盤游無已太康。此金陵再盛也。子野少嘗夢入山中。石梁跨道。瀑布洒空。洞中二老僧。跌坐。周繞木闌以防虎。後游天台山洞。宛如夢中。木闌猶在。問之士人云。老僧化去久矣。自是恍然省悟。專精內典。作和寒山子詩。

靜志居詩話。虞山錢氏序金陵社集。攷之未得其詳。青溪社集。倡自隆慶辛未。而非萬歷初年也。朱秉器停雲小志云。青溪自後湖分流。與秦淮合。當桃葉淮清之間。有邀笛步者。晉王徽之邀桓伊吹笛處也。陳明府芹卽其地。爲閣焉。俯瞰溪流。頗有幽致。歲辛未。費參軍懋謙約余爲詩會其上。於是地主則明府。次則唐太學資賢。姚典客。胡民部世祥。華廣文。復初。鍾參軍倬。黃參軍喬棟。周山人才甫。盛貢士時泰。任參軍夢榛。先後游而未入會者。則張太學獻翼。金山人鸞。黃山人孔昭。梅文學鼎祚。莫山人公遠。王山人寅。黃進士雲龍。夏山人曰瑚。紀亳州振東。陳將軍經翰。汪山人顯節。汪文學道貫。道會。沈太史懋學。程文學應魁。周文學時復。癸酉復爲續會。則吳文學子玉。魏廣文學禮。莫貢士是龍。邵太學應魁。張文學文柱。每月爲集。遇景命題。卽席分韻。同心投分。樂志忘形。問事校評。期臻雅道。會錄詩若干刻之。命曰青溪社稿。許石城先生敘其首。續會錄詩若干。吳瑞穀敘之。會余領渝郡符。任參軍入興都。稿遂散逸。後方民部沆。葉山人之芳入焉。余馳書社中。期稍收輯。無何。胡民部費參軍以註誤謫。黃參軍以領郡行。已方民部亦因事出。盛曾不常。良朋星散。回首江東。雲樹在望。秦淮煙月。閣爾銷魂。因紀舊遊。略次其姓氏篇什如左。按此青溪社集之本末始備。錢氏未見秉器小志故也。

喜諸君子入青溪社

邀笛亭前舍釣竿。丹楓林外候金鞍。吟邊綠酒秋初煖。花底幽盟久未寒。才子一時追鄴下。故人幾載隔雲端。諸君莫更輕離別。萍迹應憐此會難。

和寒山子詩

野日沈蒼煙。樵徑斷人語。衆山木葉下。颯颯飛寒雨。

王鏞二首

鏞字公範。閩人。嘉靖甲午舉人。官思明同知。有冶山拙稿。

到揚州

峭帆昨夜發高郵。迢遞湖光萬頃秋。殘月夢回清角曉。榜人來報是揚州。

宿荆南普明寺

歇馬叩禪關。浮生得暫閒。龍堂寒月上。虎渡宿僧還。梵磬發清籟。曇花照古顏。應憐此信宿。無夢向塵寰。

薛欽三首

欽字寅甫。懷安人。嘉靖甲午舉人。官太平教諭。有薛博士集。

林煥嘉靖福州府志。教諭薛欽。舉人謝啓元。徐拱。葉麟。俱有詩名。

靜志居詩話。薛君詩頗清越。近於皆山樵者。曹能始序徐惟和詩云。國自林膳部後。百餘年而得鄭考功。又數十年而得薛博士。其推重若是。

隴頭水

不向樓蘭戍。那經隴水頭。聲將金閣恨。流作玉關愁。月暗聞笳夕。風淒選騎秋。猶聞嗚咽處。更在海西樓。

送林天宇之桂陽

自昔衡陽外。傳聞少雁過。別君從此去。無那故人何。叢竹行難盡。清猿聽漸多。相思杜蘭夕。秋色滿湘波。

黎陽道中有懷

河上秋風至。蕭蕭不可聞。蟬聲下高樹。雁影出重雲。古道蒼煙斷。平田綠水分。自能悲宋玉。況是惜離羣。

謝啓元一首

啓元字本貞。閩人。嘉靖甲午舉人。

經臨城廢縣

縣荒名不改。城壞土猶存。寂寂南塘路。悽悽北郭門。桑麻空滿市。槐柳半成村。尙有龐眉叟。能談廢置原。

# 明詩紀事卷十九

## 戊籤

尹臺十二首

臺字崇基永新人嘉靖乙未進士選庶吉士授編修歷中允修撰諭德侍講遷南祭酒改北進少詹兼學士遷南吏部侍郎就遷禮部尚書有洞麓堂集十卷

四庫總目臺以護持楊繼盛一事爲清議所歸集首鄒元標序稱其詩力追唐雅制疏書序記銘狀表出入漢宋闡釋名理不屑綺語今核其所作尙不誣云

田按尙書不附和武定分宜其官南都諫部保全譚襄敏直西苑撰青詞時有諷諫大節可謂不阿當時不以詩名擷其佳作雅質風藻不愧名家

## 別饒子聞

葛生在河渚。縣延自結根。何意中林楚。垂蔓相翩幡。人生託交故。義合情與存。甯期時命怫。懿好不久敦。棘瓜有芳實。三歲零寒原。幸蒙塞采惠。棄遠難重論。

## 黃憲墓

漢季多高賢。黃生特淑妙。白壁出塵匱。羣琛仰孤照。所悲朗粹質。中隕沈靈曜。雖寡河汾議。不殊廣川調。

我行歷楚墟。問道回山嶠。側思千載人。悽惻墓堂弔。

寶寂寺宴集用壁間韻

尋春入始夏。嘉宴洽今時。蘿擁巖扉寂。花飄石棧危。絃歌娛日晚。車馬下山遲。坐惜華宵月。因吟鄴客詩。

嘯巖寺泊

維舟依古寺。解纜溯幽源。花發渚煙聚。草青江雨繁。魚梁交石嶼。鳥路界山村。坐羨垂綸者。看雲過曉昏。

南臺寺

竹隱珠泉溜。蘿垂錦壁陰。危臺迸日峻。飛閣裊雲深。玉髓行堪掇。金芝往獨尋。暫詣靈岳賞。一慰尙平心。  
礪峯陟南禮侍。余在金陵引跂。迄左一觀。余改北雍。礪峯入觀。得觀無幾。復別去。作詩敘往。用抒積思。

久矣金屏載筆從。每嗟詞賦擅雍容。那知北固煙中旆。仍別西清雨外鐘。柳曲樽罍經歲憶。花邊笑語幾時逢。蓬萊出入神仙地。目極天南綵霧重。

河間道中

倦客風塵未息機。雙旌馬首趁殘暉。滹沱水落魚龍靜。返澤春深雁鷺歸。黑髮虛名慚敝帚。青山獨往泥征衣。芙蓉玉筍菟裘計。老大空悲願每違。



山行絕句二首

秋花映路開無數。可愛紅枝間白枝。不聽疏林黃葉墜。風光渾道是春時。  
漁家四五西山側。苦竹陰疏自一村。昨夜溪添三尺水。沙鷗無數到柴門。

西湖竹枝詞

朝見南高峯欲雨。北高出日又多時。綠虹宛轉垂照水。欲渡無船郎得知。

西湖采蓮曲

湖市羅裙映玉缸。蘇隄楊柳拂船窗。采蓮誤觸鴛鴦起。飛向花間箇箇雙。

寄趙白樓總兵

上谷將軍趙白樓。忠精長貫赤虹流。慣馳匹馬獵深澤。自射名王黑水溝。

郭朴二首

朴字質夫。安陽人。嘉靖乙未進士。選庶吉士。授編修。歷侍講。左庶子。侍講學士。遷禮部侍郎。改吏部。加太子賓客。進南禮部尚書。加太子少保。改北。尋改吏部尚書。加太子太保。兼武英殿大學士。參預機務。加太保少傅兼太子太傅。贈太傅。謚文簡。有集五卷。

田按。史稱文簡兩典銓衡。以廉著。惜輔政未久退歸。優游林下三十年。觀其詩詞。從容暇豫。與貴溪輩之躁進獲禍者殊科矣。

閒居二首

性僻真堪隱。境幽心益閒。灌園安鄙事。採藥理衰顏。林鳥陪吟咏。溪雲共往還。落花苔徑滿。蓬戶日常關。小築成村墅。幽栖與懶宜。看花聊酌酒。對竹漫哦詩。老眼雲山媚。閒情魚鳥知。獨將農圃業。仰戀太平時。

趙貞吉二首

貞吉字孟靜。內江人。嘉靖乙未進士。選庶吉士。授編修。遷中允。擢左諭德。以事下詔獄。廷杖。謫荔波典史。遷徽州通判。進南吏部主事。累遷戶部侍郎。以忤嚴嵩奪官。隆慶初。起禮部侍郎。進南禮部尚書。仍留直講。兼文淵閣大學士。參預機務。加太子太保。贈少保。諡文肅。有集二十三卷。

田按。文肅詩豪曲快字。不得以成派繩之。

王喬洞

柯爛人歸古木寒。紺巖靈壑野雲團。騎來黃鶴丹砂頂。飛去青天白玉棺。流水調中春欲半。洞簫聲裏夜將闌。思輕塵骨超千劫。願遇金童捧一丸。

宿蘇長公洗墨池亭作

江空草綠酒旗風。半醉黃州煙雨中。五百年來名輩盡。有人重唱大江東。

王立道十首

立道字懋中。無錫人。嘉靖乙未進士。選庶吉士。授編修。有具茨詩集六卷。文集九卷。遺稿一卷。四庫總目。立道詩雖微嫌婉弱。而冲容淡宕。不爲奇險之語。猶有中唐錢劉之遺。

張治龍湖集。懋中詩冲雅駸駸。入章柳門戶。

槐野存笥稿。懋中談詩稱張司業。劉隋州。及索其自作。讀之。果皆似。

田按。懋中入翰林。故事。館師課之而已。嘉靖乙未。永陵臨軒試之。選三十人。懋中第一。懋中爲唐荆川妹登。文學歐陽。詩學中唐。年三十八卒。同時名輩哀悼之。王槐野作傳。張龍湖。唐荆川作志銘。尹洞山作解。王子哀文。洞山文詞旨最美。今洞麓堂集不載。當在未刻稿中也。

### 詠史

館陶主人翁。洛陽賣珠子。散金買聲名。寵愛傾戚里。翩翩東方生。滑稽何其鄙。一朝辟戟言。萬乘逡巡起。雄略代所希。舉俗憎逆耳。坐令狐鼠驕。白日遊都市。

### 銅雀伎

漳河流日夜。歌舞未能休。豔色今誰妬。餘香空自留。朝雲不作雨。陵樹早生秋。滿目多疑塚。君靈在此不。

### 遊仙二首

仙人住玉京。累劫道初成。指樹元非姓。飡松偶得名。龍嘘雲蓋引。虎奉嶽圖迎。相待天台路。何時返赤城。玉室書名久。清溪得道初。赤文河上籙。鴻寶枕中書。龍吐燒丹火。鸞驂度海車。偶來華表上。終與世人疏。

泛清溪

幽尋極寥廓。理棹清溪長。落日照孤嶼。微風生夜涼。須臾遠氛淨。百里開湖光。漁子相傍宿。月明歌滄浪。採芳不能浴。悄然悲沅湘。

秋居用唐人韻二首

四戶唳蜚亂。秋陰欲上階。菊花收作枕。草蔓緝成鞋。得句先書壁。因琴別置齋。溪雲與山月。總不費安排。木落隨寒雨。林開際遠天。水紋搖篔簹。竹秋親入琴絃。倚樹禽相語。班荆鹿共眠。機心日以盡。自訝骨如仙。

題顧洞陽青溪莊二首

罷官閒愈好。負郭有瓜田。宦味陶元亮。詩才賈浪仙。高齋聽雨枕。斜日過湖船。誰共幽吟者。空聞招隱篇。知君閉關久。一徑落花深。書癖年長在。春盟詩至尋。空山幾兩屐。遠道四愁吟。北望休相笑。平生魏闕心。

送蔣醫歸江陰

遠向金門欲獻方。暫因採藥去江鄉。開逕我須從蔣翊。避名君莫似韓康。

靳學顏五首

學顏字子愚。濟甯州人。嘉靖乙未進士。除南陽推官。歷吉安知府。累遷布政使。入爲太僕卿。改光祿。以右副都御史巡撫山西。召爲工部侍郎。改吏部。有兩城集二十卷。

四庫總目學顏詩格律清整。蹊徑尙存。不脫歷下流派。

升菴集瀑布詩人盛稱廬山。雁蕩亦有之。地志云。廬山循崖直下。不知雁蕩之飛墜。飄散而可觀也。吾蜀梁山縣蟠龍山有之。與雁蕩相似。斬兩城云。大勝廬山。有詩云。神女碧瑤簪。明珠構瓔珞。纖手按鍾球。鈞臺響天樂。仙人環珮玉珊珊。曉跨蒼龍謁帝關。醉舞婆娑渾忘卻。天風吹挂翠微間。

田按。子愚頗擅才華。集中有七諷。解嘲等篇。類以作者自命。詩則古體摹襲前人。時有佳篇。近體率意頽唐。余檢明史。子愚巡撫山西時。應詔陳言。敷陳愷切。深中時弊。而兩城集不存此篇。此則編集者之過也。

### 長安道

金絡青絲纏。翩翩紫駟馬。白面誰家郎。借問冶遊者。調笑章臺側。繫轡垂楊下。垂楊穆穆白日長。壚頭春酒鬱金香。高樓思婦辜珠箔。碧草如煙空斷腸。

### 東京歌

濯龍門前車馬流。無人不道入青樓。盧家少婦鳴箏坐。逢著春光不解愁。

### 渭城曲

春風送客渭城西。折柳亭前落日低。驄馬漸隨塵影沒。黃鸝飛上戍樓嘯。

### 陽春臺

陽春臺上雪霏霏。漢水無情日夜歸。楚客不知何處去。歌聲猶逐綠雲飛。

卽事

石磴參差蔓薜蘿。空亭獨坐夕陽過。不知溪上秋多少。但覺尊前落葉多。

王維楨六首

維楨字允甯。華州人。嘉靖乙未進士。選庶吉士。授檢討。歷修撰。諭德。遷南國子祭酒。以省母歸。值地震陷死。有槐野存笥稿二十卷。

藝苑卮言。王允甯詩。如馬服子陳師。自作奇正。不得兵法。又如項王。嘔嘔未了。忽發暗鳴。

詩藪。嘉靖時。爲杜者王允甯。孫仲可。爲六朝者黃勉之。張愈光。允甯於文。矯健。勉之於學。博洽。皆勝其詩。

列朝詩集。允甯論詩。服膺少陵。自謂獨得神解。尤深於七言近體。以爲有照應開闔。關鍵頓挫。其意主與主比。其法有正插有例插。而善用頓挫倒插之法者。宋元以來。惟李崕峒一人。及其自運。則簞策棘澀。滓穢滿紙。如潦倒措大。經書講義。填塞腹笥。拈題豎義。十指便如縣錐。累人捧腹。良可一笑也。

田按。允甯與張太谷書云。本朝作者。空同聖矣。卽大復猶卻數舍。若倒插頓挫之法。自少陵後。善用之者。空同一人而已。牧齋指擊崕峒。故於允甯。醜詆不遺餘力。余檢何元朗四友齋叢說云。許石城得顧東橋文衡山蔡林屋王雅宜諸人詩。裝成卷。求槐野跋語。槐野逐句破調。無一當其意者。信乎天道好還。宜來牧齋之醜詆也。允甯五律亦有佳篇。竹垞有句無篇之說。亦爲牧齋之論所懾耳。

送駱太史謝病歸湖州

忽謝金門直言尋碧海濱。明時豈無意。旅病苦傷神。白髮愁中長。青山夢裏真。知非鷗鷺侶。暫與薜蘿鄰。

廣德寺送別陳子

俱是游京國。獨憐尋故山。鄉心因子劇。別句對僧刪。枯沼風荷咽。空林夕鳥閒。前程愁欲暮。乞與一燈還。

孝烈皇后挽歌

範內留芳訓。扶天有駿功。仙遊知跨鳳。聖念爲當熊。玉珮虛無裏。蒼雲悵望中。宜春花照眼。淚灑舊時叢。

長陵恭謁

文皇陵殿傍。居庸覽盡千峯壯。此峯石壑蒸雲蹲。虎豹玉泉含霧臥蛟龍。舊京想像明王祚。窮漠淒迷破虜蹤。埋劍藏弓元勝地。晚來時望紫氛重。

春意

春意今朝動。鄉關萬里遙。客心共江柳。日夜緒千條。

苦熱行

海上三山寒色開。丹梯何處陟崔嵬。道人晝臥洪鑪裏。赤脚蒼崖夢往來。

劉繪五首

繪字子素。光州人。嘉靖乙未進士。授行人。遷戶科給事中。轉刑科右給事中。出爲重慶知府。有嵩陽先生集二十卷。

四庫總目繪詩局度宏整而乏深致文不加修飾暢所欲言劾夏言一疏但以不戴所賜香葉冠激世宗之怒則非諫臣之體案明史夏言本傳稱賜香葉束髮巾言謂人臣非法服不受帝積憤欲去言嚴嵩因得間之至言得罪下獄帝猶及前不戴香葉冠事據此則繪是疏或當有所受之歟

列朝詩集子素長身電目高準修髯好讀左氏縱橫家言擊劍蹴鞠挽六鈞弓搥鼓亢歌喜通輕俠計偕入都涇陽王生引少年數十輩逆之邯鄲道上校獵縱酒聲滿燕趙間矣成進士與李開先唐順之趙時春爲文章意氣之交在省垣值貴溪用事抗疏詆譏上頗是之貴溪度無以難乃遣客李寶以相術來說子素怒摔寶柱下已而從給舍壽貴溪貴溪手玉碗行酒子素揮其碗碎地客盡驚出明日疏夏十罪不報六月朔晝晦上大恐問天官主何占子素引漢書對請去言以塞天怒明日遂逐貴溪子素出守重慶會貴溪再相嗾南省論罷乃浚治陂池種魚十萬頭隄樹千章盡有蕪葭菱藕牛羊豚豕之利又責僮易鹽鬻馬課其入息身與俠少年射獵熊山下得禽置酒自撰歌曲以娛其母晚年酷好樛蒲病痿以死子素文章雄健可喜其詩才氣奔騰而風調未諧多生猶稟兀之致皇甫子循敘其集云先生應詔諸疏經術文章可謂兼之若騷賦詩歌則固北海餘聲宣城寄興非所專好也知言哉

梁園風雅嵩陽先生放歸益治玄湖別墅移石成奇峯匯水爲巨浸花林竹嶼壯麗甲於汝南先生與賓客放浪賦詩以此自娛其詩宏博整瞻浩渺渾深披瀟陸之晨葩摘顏謝之春藻蓋光黃之奇偉人也

田按山陰周祚吳縣黃省曾作書推挹李空同空同刻集以其書附後劉子素亦作書推服楊升菴升菴集亦附子素書云僕之仰足下者有年方其挾策西蜀賜對明光垂虹掣電振耀宇內知足下爲相如揚雄其人也至操觚藝苑校書祕府辭調敵乎金石頌聲叶於韶濩知足下爲劉向王褒其人也至櫻時吐氣舒悃飛章叫閭闔於五奏攀琅玕而九死知足下爲賈誼晁錯其人也及今成集所著士人所傳傷時述懷其孤憤結憂之聲憫流離歎瑣尾者又競英綴彩燦玄珠而流華寶凌蹤乎七子飛蓋乎四傑又知足下爲鮑明遠謝玄暉其人也子素文章宏麗足稱作者詩則有偉特之句而鮮完善之篇豔曲麗歌尤



爲猥下。趙彥復梁園風雅。舍李川甫而錄子素。非識曲聽真者也。

送顧聖少遊蜀中便寄渝州諸君子

天涯飄泊闔闔客。仗劍萬里還西行。秦姬當壚作吳曲。爲君勸酒春風生。高歌壯遠遊。三杯與君別。匹馬遙衝劍閣雲。征衣直拂峨眉雪。江空擘芙蓉。萬壑披雲松。歸泛巴渝水。聊醉金碧峯。棠溪花正豔。安居酒復濃。城中士夫多豪賢。客中相見應相憐。畫舸弄杯送明月。古臺搖筆凌飛煙。儻憶往年一相訊。慙慙爲我傳芳信。離亂中原尙有子。兵戈滿地雙蓬鬢。塵海萍蹤無定居。夜魂巴峽幾淩虛。秋風送客腸應斷。莫怪山人懶作書。

劉生

銅焦響玉營。殺虜度龍庭。代馬雪中躍。吳刀掌上鳴。醉過平樂觀。叱咤羽林兵。慙予空託姓。藜火照殘經。紅門晚眺西山蘭。若寄翠禪師。

丹梯拂玉繩。鷲嶺俯峻嶒。月色連三殿。嵐光度五陵。花壇應說法。竹院已燃燈。何日天台路。閒尋出世僧。薔薇花下聽鄰箏。

窺妝羞楚女。翦綵笑吳宮。總翠偏縈霧。叢香易惹風。葉嬌才半綠。花亂不全紅。未待銀箏送。先令玉犖空。

挽唐荆川

扈蹕當年染玉毫。山中較獵挽烏號。英魂一夜歸何處。怒湧江湖百丈高。

趙大佑一首

大佑字世徹。台州太平人。嘉靖乙未進士。除鳳陽推官。徵授監察御史。歷大理丞。進少卿。累遷僉都御史。進刑部侍郎。遷南刑部尚書。就改兵部。參贊機務。有燕石集四卷。

弇州山人續稿燕石詩。和平朗爽。有朱絃疏越之音。五言古近體尤自長城。

寄畚川諸君

生涯歸去未全貧。斗酒猶堪共論文。何日雨中能過我。幾年花下憶逢君。郊扉習靜臨流水。草閣抽思對野雲。小徑舊曾留轍迹。可令猿鶴笑離羣。

林廷機三首

廷機字利仁。閩人。尚書瀚子。嘉靖乙未進士。選庶吉士。除檢討。遷國子司業。進南祭酒。就遷太常卿。擢工部侍郎。改禮部。進工部尚書。復改禮部。贈太子太保。謚文僖。有世翰堂稿十卷。

東南嶠外詩話。林文僖有遊虎邱七律云。雲梯石磴望重重。拄杖來登最上峯。竟日微風生院竹。半窗飛霧瑣山松。何人能識纓金字。往事空留試劍蹤。爲愛老僧頻薦茗。夜歸還叩上方鐘。按虎邱寺中舊有王子吳鼎。寺僧雖寶之。而不詳爲何物。郡志亦闕焉。余爲按薛氏鐘鼎款識。釋其疑滯。徵詩銘。遂爲吳門第一吉金。與焦山無專鼎並有千古矣。文僖此詩第五句。即指此鼎。可知當時已有賞識之者。而顧伊人作虎邱志。尚以爲大香爐。可發一笑也。

田按余檢世翰室稿文僖遊虎邱詩第五句係何人舊築藏書室疑梁君所見別一本也。

西園同年燕集

徐氏園林自幽絕。佳辰臺省并騶來。亭亭落日煙蘿裊。漠漠秋雲水檻開。地勝恍陪金谷宴。節臨先試菊花杯。曲江往事渾如昨。白首相將更幾回。

鳳凰臺和李韻

鳳逝臺荒只故邱。六朝往事水東流。山河誰識帝王宅。宮殿空成麋鹿遊。天迴煙雲開石壁。日斜鷗鷺散江洲。金陵佳麗還如舊。惟有登臨使客愁。

歌風臺

當年歌沛上。霸氣亦雄哉。寂寞西京業。如今只廢臺。

何維柏一首

維柏字喬仲南海人。嘉靖乙未進士。選庶吉士。改監察御史。坐劾嚴嵩廷杖免官。隆慶初。召復官。擢大理少卿。遷右僉都御史。歷左副都御史。遷吏部侍郎。以忤張居正出爲南禮部尙書。旋罷官。謚端恪。有天山草堂存稿八卷。

四庫總目朱彝尊明詩綜謂維柏乞休詩云。樂事尙饒新歲月。勝遊不改舊雲山。乃侍其父與鄉人爲九老會時所作。今考乞

休詩為萬歷丙子得旨歸老之作。而其父與九老韻七律二首。則作於嘉靖戊申。乃劾嚴嵩後削籍歸里時作。彝尊徵引偶誤。殆未見此集歟。

去婦歎贈三溪包公

直木無繁柯。安能附蔦蘿。託身苟得所。時命如吾何。

康太和一首

太和字原中。莆田人。嘉靖乙未進士。選庶吉士。授編修。歷春坊諭德。侍講學士。遷南禮部侍郎。就遷工部尚書。有礪峯集。

蘭陔詩話。礪峯在翰苑二十年。閉戶著書。屏迹樞門。人譏其拙。作拙宦對以述志。致仕時。值莆中倭亂。寓嘉禾四年始歸。其詩有白髮多情催我老。青山無地見吾家。庭堆白骨人蹤少。鬼哭荒村日色稀。燕子不知舊壘破。呢喃猶向故園歸。皆淒腕可誦。

寒時作

春入滄浪覓釣舟。淡雲疏雨正悠悠。文成祇有窮難送。老至應知歲不留。養鶴尚憐雙口累。看花聊減半生愁。思家無計清宵坐。矯首高城月滿樓。

馬森一首

森字孔養。懷安人。嘉靖乙未進士。授戶部主事。歷郎中。出為太平知府。遷江西副使。歷參政。按察使。布政使。就擢巡撫。右副都御史。入為刑部侍郎。改戶部。坐事左遷大理卿。起南工部侍郎。改戶

部以右都御史總督漕運兼巡撫鳳陽進南戶部尚書改北贈太子少保諡恭敏有鍾陽集  
塞下曲

列戟牙旗五色高碧油幢裏醉葡萄可憐營外風沙起夜夜征人枕大刀

張舜臣一首

舜臣字熙伯章邱人嘉靖乙未進士累官戶部尚書左都御史贈太子少保

山寺

休沐依山寺行行石澗中誰令朝市客盡日坐松風

孫植一首

植字斯立平湖人嘉靖乙未進士除南刑部主事累官刑部尚書贈太子太保諡簡肅

諸省丈遊西山以病不赴

聞道香山寺龍宮倚石岑泉聲來樹杪雲氣接峯陰路裊丹梯峻檐臨碧澗深無能陪妙躅延望發孤吟

張瀚二首

瀚字子文仁和人嘉靖乙未進士授南工部主事歷郎中出爲廬州知府改大名累遷陝西布政使就遷巡撫右副都御史入爲大理卿進刑部侍郎改兵部總督漕運改督兩廣軍務以事鑄秩

歸起撫陝西。遷南右都御史。就改工部尚書。召拜吏部尚書。加太子少保。以忤張居正罷歸。贈太子太保。諡恭懿。有奚囊蠹餘二十卷。

田按。尚書始附和江陵。及江陵奪情。卒能持正。世以此多之。詩乃平平。

次韻答沈鴻臚

詩篇推正始。今復見雲卿。錦字湖天遠。塵心淮海清。蓴鱸秋日思。猿鶴故山情。和靖廬邊社。因風憶友生。

雨夜

積雨凝陰二月寒。長宵寂寂坐來殘。獨醒應有張平子。賦得閒愁祇自看。

陳鳳六首

鳳字羽伯。上元人。嘉靖乙未進士。除南陽推官。改彰德。徵授刑部主事。歷郎中。出爲江西僉事。歷四川。陝西參議。有清華堂摘存稿六卷。

馮汝訥光祿集。羽伯五古。初啟唐人局鑰。後入晉。魏闔奧。七言歌行。豪逸雄俊。真得盛唐三昧。五七言近體。雅秀清暢。王孟之流。

楊慎升菴遺文。羽伯古詩。漢魏遺響。近代所僅見。七言長歌。與盛唐諸大家埒能爭勝。而尤難者。在自成家而不蹈襲。非邇日折洗之敝。

藝苑卮言。陳羽伯詩。如東市倡募青樓價。微傅粉澤。絕工顰笑。

帝里明代人物略。羽伯官刑部主事。署中故有白雲樓。暇日與文學僚友眺詠其上。稱爲西臺雅集。列朝詩集。嘉靖中。顧華玉以澗轄家居。倡詩學於青溪之上。羽伯及謝應午。許仲貽。金子有。金子坤。以少俊從游。相與講藝談詩。金陵之文學。自是蔚然可觀。

田按。羽伯五字詩華妙。弇州擬之東市倡。無乃唐突。

### 攝泉居士許公

玄度邱壑姿。投册事間寂。治生不厭餘。取足在惟適。作詩謝雕績。青山恣游歷。平生所交親。白首共欣戚。子也青雲器。才任萬人敵。文采照當世。藝苑樹奇績。悵望攝山泉。悽惻山陽笛。

### 惜別行送朱子平甫使江南

惜別復惜別。四牡行行俱吳越。長安有客正思歸。因君夢遶秦淮月。通藉金門今幾秋。長安共臥省中樓。相逢日夕共傾倒。劇談大笑輕五侯。予本澹蕩人。君亦跡弛士。感君意氣爲交歡。豈識人間別離事。盛年藝苑擅風流。況復經過六代邱。江上停舟應弔古。爲予先賦白蘋洲。

### 雨中酬諸君見過

久雨空堂靜。高人載酒過。布袍同濩落。長缺任悲歌。水氣浮高柳。秋容入敗荷。明朝是九日。無菊欲如何。同孟孔彰秋日偶然作

久緣朱紱累。夢斷白鷗羣。幾對宛城月。遙憐鍾阜雲。開簾看秋色。散帙坐斜曛。絡緯催寒急。淒淒不可聞。

秋日登雨花臺

落葉山中寺。秋風江上臺。鳳城雙闕迴。牛渚片帆來。繁吹暮仍急。清樽醉復開。東籬菊尚晚。留取盡餘杯。

舞陽縣舞泉書院

碧甃春泉出。青皋夕照懸。聊因謝簿領。暫得眺山川。綺閣棲林杪。瑤峯落檻前。柳隄晴正媚。麥壠氣初暄。雲物還茲土。絃歌感昔賢。晚來鏡吹發。歸鳥散林煙。

林應麒一首

應麒字必仁。仙居人。嘉靖乙未進士。除吳縣知縣。遷惠州同知。有介山稿。

行路難

白日在天難照陰。青銅作鏡難照心。古來怨士悲白壁。至今讒口銷黃金。我欲歌此曲。此曲哀已深。不必漸離筑。不必雍門琴。不必楚妃歎。不必梁父吟。君不見伯奇履霜申生死。子胥浮革靈均沈。精誠不鑒君與父。他人悠悠復何愬。

田按。此詩仙居志作張伯厚詩。依戚學標三台詩錄採入介山稿。

牛恆二首

恆字槐亭。武功人。嘉靖乙未進士。官周藩左長史。



因樹屋書影牛左史周藩宮詞詩雖不多可代夢華錄數卷

周藩宮詞二首

春殿牙籤萬軸餘。香勻風細綠窗虛。侍兒臨罷誠齋帖。函出先呈女校書。  
吹臺南下合婆墳。憶昔從王掌祕文。今日綺羅何處是。野花嘯鳥自紛紛。

施峻一首

峻字平叔。歸安人。嘉靖乙未進士。除南刑部主事。歷郎中。出為青州知府。有漣川集八卷。

藝苑厄言。施平叔如小邑民築室。器物物完。

田按平叔七言。如南嶽先生句曲去。東林長老沃州還。藥欄當午蜂偏亂。釣檻平溪水不渾。河橋細雨舟初泊。山郭寒煙梅半開。未信年華欺客鬢。也知春色到鄰家。殊自清脫。

過南郭野寺

休沐出南郭。尋僧一扣關。孤燈燃白晝。疏磬滿秋山。東帶經年苦。看雲盡日間。齋廚清供罷。驚鷓欲飛還。

趙統二首

統字伯一。臨潼人。嘉靖乙未進士。官戶部郎中。有驪山集十四卷。

宿土門

帝命辭金闕。客身宿土門。星河虛草閣。山壑會花村。縱飲添山蕨。長歌倒瓦盆。疏狂忘路遠。衰薄負君恩。

憶魚池灣舊遊

秦王陵下魚池灣。斷葦荒蒲近對山。白酒黃雞秋興在。太平只欠一身閒。

陳暹三首

暹字德輝。閩人。嘉靖乙未進士。除大理評事。出爲安慶知府。歷兩淮運使。廣西參政。廣東布政使。有集四卷。

田按。德輝五言清拔。惜不得其全集錄之。

粵西松樹

蒼蒼庭下松。枝榦碩以修。才質詎不美。郢匠弗見收。淒風薄松枝。鳴聲何悲愀。悲愀不可識。無言以意詎。炎荒土氣溼。宅宇材易蝨。竹雞久不鳴。白蟻爲寇讎。所以梁棟姿。棄置於林邱。南橘北爲枳。土地職其由。移之植徂徠。山川邈且適。所期飽霜露。歷歷春復秋。流膏伏龍虎。仙鼎終相求。

登粵山謁諸葛廟

諸葛龍臥時。聞達非所志。三顧勞賢主。出門答高誼。恢復雖未竟。忠誠貫天地。千載出師表。何人不垂涕。王公斯文宗。今古若神契。開山擬南陽。廟建風化係。伊余謁遺像。維時適清霽。躡崖縱遊眺。長風吹衣袂。衡嶽青冥中。洞庭一何細。落日散餘霞。長空一鳥逝。回輿下山阪。惆悵白雲際。

下邳懷古

汎舟臨古甸。荒郊起遐思。猶聞石家城。復憶圯橋履。滾滾黃河流。蕭蕭馬陵樹。今人更來過。昔人知何處。落日滿津樓。踟躕未能去。

許穀四首

穀字仲貽。上元人。嘉靖乙未進士。除戶部主事。改禮部。吏部。歷員外郎中。遷南太常少卿。謫浙江運副。遷江西提學僉事。進南尚寶卿。有省中稿二卷。二臺稿二卷。歸田稿十卷。

四庫總目。穀詩格頗俊爽。當其合處。時得古人之意。而失於芟擇。

四友齋叢說。余戊午年致仕。南都諸公。押衡山鶯字韻詩贈。獨許石城一聯云。買得典池堪鬪鴨。種成芳樹好藏鶯。殊有雅思。續金陵瑣事。石城許公有句云。平生愛我無如酒。凡事輸人不但基。薛方山極口稱之。

列朝詩集。仲貽爲顧華玉高第弟子。風流儒雅。以耆宿主盟詞壇。蓋先後相望云。

靜志居詩話。石城詩頗似大歷十子。

田按。仲貽律尙華整。茲錄其有清思者。

過吳門訪文丈

吳門風雨獨停舟。重訪仙人洞壑幽。錦字滿床多逸興。碧梧百尺自清秋。久拋金馬心逾遠。一笑青山意總投。慙愧十年塵土客。又將書劍出皇州。

寄孫學職

歲首蒙君問謫居。冰霜忽訝歲將除。風前苦憶瓊枝樹。海上欣傳白雁書。賓榻久懸殊有待。雪舟重訪定何如。丹山碧水登臨地。肯信年來已結廬。

寄文休承

算老同驚七袞餘。芳年朋輩總邱墟。山中每自看梁月。江上如何斷鯉魚。往日草堂頻下榻。幾時茂苑再停車。揮毫見說清強在。好寫新篇慰索居。

謝政口號

詔過留都喜罷官。罪疑遙荷聖恩寬。久叨軒冕曾何補。乍到林泉已自安。郭外旋分桑落酒。花間新製鹿皮冠。陶然自著閒居賦。書遍閒堂竹萬竿。

任萬里二首

萬里字圖南。掖人。嘉靖乙未進士。官禮科給事中。有梅軒詩藁。

濤音集。王西樵云。黃門素有剛介之目。以疏宮僚忤旨放歸。蓬蒿三徑。巾屐蕭然。詩如秋霽澄江。蕭森平遠。白沙錦石。復饒清麗之觀。五言如沙岸鼃鼃坼。澄潭日月浮。七言如不妨佳句題青竹。更喜繁花媚遠天。平沙渺渺自流水。芳草萋萋空好春。并佳。

聞笛

承恩初出塞。聞笛更逢秋。清比桓伊弄。哀添向秀愁。關山臨夜月。楊柳折邊州。一曲那能盡。淒涼欲白頭。

過戰場有感

萬里秋風吹朔漠。千年營壘落寒雕。水聲不住東流去。疑是秦人怨未消。

陳棐一首

棐字□□。鄆陵人。嘉靖乙未進士。歷禮科。戶科給事中。累遷右僉都御史。巡撫甘肅。有文岡集二十卷。

權店驛

盤陀南來一百里。宛如閣道蜀門行。荆扉茅屋人家少。盡日潺湲聞水聲。

薛應旂一首

應旂字仲常。武進人。嘉靖乙未進士。除慈谿知縣。遷南吏部主事。歷郎中。出爲浙江提學副使。改陝西。有方山集。

四庫總目。應旂識勢論。稱黨錮興而漢社屋。玄談盛而晉室傾。清流濁而唐祚移。學禁作而宋舟覆。其初文雅雍容。議論標致。不過起於一二人之獵勝。而其究乃致怨惡。沸騰於寰中。干戈相尋於海內。而潰敗不可收拾云云。若於七八十年之前。預見

講學之亡明者篤論也。

答鄭嘉興

驛舍臨西水。相逢鄭子真。幽懷在空谷。征旆尙風塵。日暮憐漂泊。途窮念苦辛。文翁元愛士。應不爲官貧。

陳堯一首

堯字敬甫。南直隸通州人。嘉靖乙未進士。除工部主事。歷員外郎中。出爲台州知府。改南安。歷長蘆鹽運使。廣西參政。貴州按察使。雲南廣西布政使。以右副都御史巡撫四川。遷南戶部侍郎。改工部。總理河道。召拜刑部侍郎。有梧岡集十卷。

姑蘇竹枝辭

洞庭山高十二峯。洞庭湖上采芙蓉。山高水遠不歸去。風雨來時愁殺儂。

盧宗哲一首

宗哲字濬卿。德州人。嘉靖乙未進士。選庶吉士。授檢討。遷南司業。歷南太僕卿。改光祿卿。有焚餘草。

贈張錦衣

朝承節鉞下丹霄。霜滿熊幡寵賜貂。路繞黃河山簇簇。風鳴青海草蕭蕭。油幢對月閒吹角。鐵騎乘冬好

射雕爲報諸蕃莫輕入。臨戎今是霍嫖姚。

劉佐一首

佐字一軒。德州人。嘉靖乙未進士。官參議。有遂初堂詩。

宿明月寺山房

梵響侵層漢。雲香護石牀。鶴巢藏古木。僧影下長廊。良夜催銀箭。天河發曉光。明當辭梵宇。暫爾聽寒螿。

郭萬程一首

萬程字子長。閩清人。嘉靖乙未進士。官刑部主事。有雲橋集。

送翁源尉

北客日歸南。南鴻亦復北。送子出郭門。令人心忽忽。

駱文盛一首

文盛字質甫。武康人。嘉靖乙未進士。選庶吉士。授編修。有兩溪集十四卷。

四庫總目。文盛詩文。於淺弱之中。時有清遠之致。文盛官翰林時。以不附和嚴嵩。移疾不出。後貧病垂死。有以千金求居間者。揮之。至沒無以葬。其胸次本高。故吐言不俗。

訪友途中滯雨

長河波浪渺無津。疋馬西風日易曛。客舍况逢三日雨。故人猶隔數重雲。山容慘淡當窗見。鳥語啁啾近水聞。信有路難行不得。旅愁鄉思益紛紛。

陳策一首

策字時偕。莆田人。嘉靖乙未進士。官台州知府。

九鯉湖

羽人一去不復還。湖上猶傳九鯉仙。流水閒雲空裊裊。碧桃春草自年年。誰從蘿洞招真隱。剩有丹邱認宿緣。中夜夢殘樓閣迥。一聲海鶴上青天。

鄭富一首

富字中虛。莆田人。嘉靖乙未進士。官潮州知府。

送馬從甫還莆

握手難爲別。裴哀雪水涯。壺公知不遠。送爾躡層霞。

汪宗凱一首

宗凱字子才。崇陽人。嘉靖乙未進士。歷官尙寶卿。有棠谿集。

人日同傅山人宿灌谿寺



人日珠林集。春懷此暫開。松雲盤古殿。蘿月映蒼苔。池卽諸天上。人傳二妙來。十年同覽眺。徒倚雪峯隈。

李樂一首

樂字和仲。瀘溪人。嘉靖乙未進士。授南吏部主事。歷郎中。出爲河南參議。累官太僕卿。

沅湘耆舊集。和仲游澁甘泉之門。清苦嚴正。人皆憚之。詩格清老。如野澗花深。蜂釀蜜。上方鐘定。鳥窺人。名句也。

鹿泉洞

石洞冥冥傳有仙。太康之後今何年。蘭香芷馥浮晴川。夾岸桃花紅欲然。洞中幽曠堪草玄。冰崖玉篠生秋妍。懸泉瀉出碧漪漣。誰傍春叢一繫船。愧無新詞石上鐫。舉頭拍手望青天。

胡汝霖一首

汝霖字青崖。綿州人。嘉靖乙未進士。累官都御史。

岳陽樓

岳陽樓閣倚雲開。漢沔風濤日夜來。欲弔湘壘招楚客。漢庭零落賈生才。

饒相一首

相字志尹。大埔人。嘉靖乙未進士。官副使。

和州道中見隱者山居

曉發和陽城。飛輿度平陸。遠眺翠微中。炊煙起空谷。竹木翠交加。深藏隱者屋。我來憇其下。幽逕何紆曲。嗟我事軒冕。半生空碌碌。長謝青雲客。躬耕南山麓。

洗桂奇一首

桂奇字奕倩。南海人。嘉靖乙未進士。官工部主事。

飛雲頂

振衣千仞上。浩浩御天風。恍惚聞仙樂。依稀駕彩虹。秋雲半巔白。海日五更紅。從此忘歸路。優游四百峯。

黃釧一首

釧字珍夫。安溪人。嘉靖丁酉舉人。官溫州同知。禦倭被執。不屈死。贈浙江參議。有墮樵錄。

田按。珍夫死倭難。王弇州爲作葬衣冠志。又輓詩云。刲後果卿空有舌。哭回弘演已無肝。

野望

連朝微雨恰新晴。沙草含風輭綠平。碧水漁人歸棹去。夕陽煙樹一痕清。

陳紹文一首

紹文字公載。南海人。府尹錫子。嘉靖丁酉舉人。官通判。有中閣集。

田按。公載乃應天府尹錫子。府尹構浮邱心遠亭。擅園林之勝。黃才伯有心遠亭分韻詩云。浮邱倚闌渚。鬱水環山郭。中流結

衡宇炎歊盡銷落。黎瑤石有心遠亭探梅詩云。京兆池亭萬樹芳。半臨秋水半含霜。紀其勝也。瑤石又有過公載浮邱。心遠亭聽公載彈琴諸詩。公載以羅浮有中閣。自號中閣山人。集名以此。公載與梁公實。歐楨伯。黎瑤石。吳而待諸人結詩社。又同遊黃才伯之門。見楨伯所作梁比部傳中。竹垞錄公載詩。不能詳其字。余爲考其詳如此。

### 游梁惟和北園

地迴揚雄宅。煙深向秀園。泉光分洞口。山翠溼籬根。選石安棋局。臨花設酒樽。莫愁歸路晚。明月映柴門。

### 蔡宗堯二首

宗堯字中父。臨海人。嘉靖丁酉舉人。授松陵教諭。遷瑞金知縣。改當塗。有龜陵集二十卷。

### 西津舟泊

薄暮西津下。孤燈歇雨時。客懷惟酒賦。春事有梅枝。月落村舂急。風寒夜棹遲。悠哉渾不寐。高枕自哦詩。

### 旅宿

旅宿高樓曉。窗含煙霧多。溪聲添夜雨。山翠長春蘿。越國懷如此。燕臺夢若何。貪看玉樹小。對酒欲長歌。

### 陶庚一首

庚字星子。雲南府人。嘉靖丁酉舉人。官承天府通判。

### 自嘲

一官敝屣竟何如。半畝荒園手自鋤。可笑夷門老賓客。等閒卻上信陵車。

郭文涓二首

文涓字稚源。古田人。嘉靖丁酉舉人。官保甯同知。有享帚集。

固鎮驛書壁

天陰野無人。日夕昏氣集。村暝暮靄凋。木落寒飆急。烈焰發郵亭。宵征度原隰。遵歷古邱墟。蕭條今郡邑。微月鑒帷涼。零露沾衣濕。浮生倏如借。流晷遞相及。胡爲勞其生。撫膺倍於悒。

銅雀臺

銅雀臺荒漳水濱。滿汀蒲柳亂河津。古原寂寞邱煙暮。廢塚荒涼野草春。一代玄宮狐兔迹。千秋黃土綺羅塵。西陵尚挂松楸月。不照當時歌舞人。

明詩紀事卷二十

戊籤

何御二十一首

御字子憲。又字範之。福清人。嘉靖戊戌進士。除廉州教授。遷國子博士。歷都察院都事。出為廉州知府。遷兩淮都轉運使。有白湖集六卷。

田按。子憲牽絲海邦。再轉京職。沈淪卑官。故不甚知名。古詩妙合音節。與寄遙深。七律健爽。鄧汝高錄閩詩。不見推挹。徐惟和晉安風雅。稍見採錄。余獲白湖全集。特標目與海內共賞之。

傷歌行

佳人來南國。穆卜啓洞房。合歡琥珀枕。連理珊瑚牀。上牀金孔雀。下牀玉鴛鴦。重重繡幃覆。疊疊翠牀張。不見珍席棄。翻同敝帷傷。束葦自河蕩。裁蒲亦近塘。慚此微賤質。奉君歲月長。絲麻易菅蒯。憔悴奪姬姜。古來遞如此。何訝獨相忘。

女兒行

十八長京華。遠別淚如泚。不見坐車人。但見行船者。春水發潞河。畫船大於屋。三日駕北風。河干勝轉轂。

江北多麥菽。江南多水稻。春稻白如銀。不似麥菽好。阿女將出門。爺孃相持哭。勿作原上棗。過江化爲棘。北地饒冰雪。南中劇霧雨。勉旃加汝餐。風氣不相似。

古意

君家織素縑。落杼皎如雪。持以贈孤寒。豈不重山嶽。向來裁爲衣。歌舞春風渥。末由答君恩。慚愧雙明月。城東僧舍夜話

涼月在東方。稍稍披雲出。清影泛高林。露華滿川陸。衆鳥驚復寂。墟煙散還宿。瀟灑序上人。棲遲塵外躅。相見究玄境。忘此吏情促。河漢忽西橫。梵鐘報華閣。

送蕭玉中歸東安

攜酒在河亭。忽念春光過。行人此時歸。芳草猶未暮。飛燕拂遊絲。初蟬響驛路。搖搖薊門舟。渺渺楚江渡。相望隔風塵。相思積煙霧。公暇多新吟。因鴻遠惠顧。

遊朱園

淹矣束微官。浩然思故里。去留未能裁。歲月忽盈紀。感事戚良時。撫年慚壯齒。及茲簿領餘。小集淹朱邸。鳴樹多珍禽。映階有芳芷。座遲山雨收。席迫溪雲起。一悟乘流心。得窮觀物理。纏牽何足疑。招尋從此始。

粵中雜詩

中夜忽惆悵。攬衣循前楹。清歌發楚調。稍變越中聲。側聽豈不異。勞者宜其情。皎皎山月高。湛湛園露零。衆鳥棲已寂。孤鴻浩獨征。美人在南國。何因達遠情。

早發廣源閘望西山道上作

西山訪昔遊。仍協省中彥。佳豫邁芳辰。清言出華宴。紆徐訂前諾。延綿得深眷。俯窮青野觀。仰極玄宵盼。梵刹布金銀。湖光照臺殿。千巖雨後姿。萬壑晴霞變。荷芡隨沿洄。鷺鴻遞隱見。行愛嵐氣襲。坐惜鳥聲綫。殊景紛在茲。盈矚詎能遍。但獲昭曠懷。歸途不知晏。

夏日山中

孟夏炎氣升。坐憐衆芳歇。徒步循河濱。輕策入林樾。偃仰巖間松。縈迴澗底葛。谷幽禽鳥稀。苔積石崖滑。鱗鱗乍起雲。微微初上月。始經苦力疲。久憩遂神豁。乃悟草玄勞。亦鄙書空拙。儻能怡性靈。無爲自戕伐。

與邑中諸友尋翫西南陽諸勝

四序互相推。二月辰初吉。王役稍紆徐。鄉國暫假息。班生無舊廬。揚子有玄室。側處敦風期。素交靄雲集。逶迤南郭行。宛轉西郊入。迂徑探邃幽。高原發昭晰。沿厓水漪漪。出浦樹歷歷。在昔懸懷想。於今窮攀陟。良時不可常。茲樂詎云極。

處女吟

深閨二十不可媒。春風吹花覆錦苔。東鄰處女年十五。已逐簫聲齊鳳舞。誰憐粉黛輕從人。百年易墜千金身。傾筐不怨梅晚落。翦拂雲綃出香閣。

寫懷寄晏石橋兼訂武夷匡廬之遊

昔日何日別君行。春風楊柳搖金城。今日何日我載旌。橫江渺渺秋風生。停車一慨嘯。揚袂且徂征。白日山鬼出。半夜鷓鴣鳴。兩人三人成市虎。止榛止棘何多蠅。險巇悲世路。憤切傷人情。紫綬金章棄安恤。黃鐘翠釜擊未平。吁嗟晏夫子。日月銷毀終有時。王侯富貴只如此。麻姑髮已頽。鬻馮何能語。金絡空追冀北羣。玉壺且待汝南侶。緘題到海頭。海水逝悠悠。君當武夷駕。吾亦匡廬遊。素女垂花寒不隕。錦屏疊翠光欲流。閣上九仙齊拍手。雲中五老皆回頭。此遊不可孤。此樂不可紀。赤沙玄石淨九秋。烏帽青鞋走萬里。纏牽結束胡爲爾。

封水登舟復作

登艫不自慊。循岸寫煩憂。風聲生極浦。月色漾中流。清淺仰河漢。徘徊觀女牛。權歌何處發。聽此心悠悠。

秋夜懷楊子立

雨後開簾爽氣生。綠槐庭院坐初晴。明河倒瀉星辰溼。涼月高懸風露清。欲倚簫聲傳鳳曲。祇愁刀尺動秋聲。夜聞白苧歌淒切。南國佳人繫遠情。



返別業述

東粵馳驅厭短篷。南溪瀟洒近冥鴻。陰符篋裏三年閉。道籙牀間幾歲通。野獵頻隨射虎將。山居未學養雞翁。海門忽報生烽燧。欲奪旄頭第一功。

獨坐念海寇未除

伏雨闌風助寂寥。海門東望旅魂銷。千家燹後傷春草。萬姓歸餘哭暮潮。日月東升氛未息。豺狼西入氣猶驕。千秋擊節思名將。衛霍何因在漢朝。

陌上吟

春風盈御陌。驅馬多如織。綠衣下馬郎。相問不相識。

塞上曲

三軍變胡服。一夕過陰山。奪得名王婦。雙提馬上還。

揚州曲

戔戔餘束巾。一機連百幅。生男不出門。生女嫁南北。

卽事

雷聲隱隱出深谷。雨色蕭蕭來遠舟。溪添春水忽盈丈。鴻濤鷓鴣滿意遊。

過徐州

歲歲春風生紫霞。徐陽三月爛桃花。笙歌一夜隨流水。認得青樓第幾家。

喬世甯十七首

世甯字景叔。耀州人。嘉靖戊戌進士。除南刑部主事。歷郎中。出爲四川僉事。歷湖廣提學副使。河南參政。進四川按察使。有邱隅集十九卷。

藝苑卮言。喬景叔詩。如清泉放溜。新月掛樹。此景殊少。不耐縱觀。景叔己酉歲以楚藩參入賀萬壽。余時見之。短而髯。溫然長者也。所有行卷。僅百餘篇耳。頗膾炙人口。又十餘年。景叔卒。近有以其邱隅集來者。云景叔所自選。余猶記其行卷內一七言律。寄王太史元思。謫戍玉壘者云。學士兩朝供奉年。上林詞賦萬人傳。一從玉壘長爲客。幾放金雞未擬還。聞道買田臨灌口。能忘歸馬向秦川。五陵他日多豪俊。空望城南尺五天。詞頗佳。而集不之選。何耶。

盛明百家詩。景叔詩爲時推重。謂在康對山。王漢波之上。明詩選。李舒章曰。景叔清穩。特少沈入之句。

靜志居詩話。何仲默視學秦中。景叔親受詩法。譚必移日。故其詩整而不浮。與許少華肩並。餘蔑有過焉者。

田按。景叔論詩云。七言律起於唐。沈杜爲宗。而律體尤難工。獨取蘇頲望春。格律完粹。冠於諸子。與李何持論稍不同。五律有唐人格意。清圓宛轉。不愧作者。

臨高臺

臨高臺。下臨深谿。上有樓觀。中天開。觀日滄海。海水一杯。僊人靈藥。在蓬萊。望而不見。思悠哉。日日臨高臺。仙人來不來。

歲暮吟

玄冬雪霰日交交。野雲黯慘冰山高。林莽晝昏風怒號。芷蘭委地等黃蒿。鶯鷓野立豺虎驕。中原鴻雁聲嗷嗷。我心忉忉增煩勞。

七夕過潼關馮董二舉人招飲溫泉

相逢難此夜。遊宴過華清。何處長生殿。當時無限情。山花送繡色。宮樹滿秋聲。罷酒中庭月。蕭然客思生。

客鷺峯寺聞棹聲

古寺長干曲。時聞鼓棹歌。雲林吾已愜。江海復如何。坐想滄洲近。興隨漁父多。西津日薄暮。看盡楚帆過。月夕再登合江樓。有懷舊遊。

往歲今宵月。羣遊眺水城。江樓還獨上。秋月爲誰明。攬贈心仍切。嬋娟夢易生。天涯有高興。應憶鑿帷情。寄憶嘉州任夢錫副使。

世途不可問。良晤渺難期。江草綠誰發。江雲獨爾思。買田應附郭。移舍想臨池。況復峨眉近。遊山定有詩。

春江曲

一水平如鏡。耶溪望轉幽。輕盈游女珮。喧動采菱舟。欲蕩青春目。還生白紵愁。何如竇家婦。織錦上高樓。

同部中諸友城南登臺

白雲望不盡。況復臨高臺。春色滿天地。客愁何處來。他鄉逢此日。萬事且銜杯。有酒不同醉。山花空自開。

出京別沈江村

客繫長安日。琴尊日過從。別離還此地。搖落正玄冬。去國非吾願。思君何處逢。到知江草發。誰共采芙蓉。

答太和尹舉人寄書兼訊兩湖陳子

江湖日悵望。萬里一書來。尊酒幾時共。瑤華空自開。聞持白雪賦。欲上黃金臺。爲謝陳書記。清朝獨愛才。

晚晴

雨色動春寒。浮雲返照殘。宴遊曾幾日。花落滿長安。江海仍多病。蘼蕪只自看。况逢湖雁過。客思詎能寬。

胡隱君環溪

聖代方招隱。高人獨倦遊。環溪懷故業。歸棹及新秋。江嶠一相送。鄉關各自愁。遐心如可慰。予欲臥林邱。

送田郡博歸漢陽

微官仍罷去。江上別愁深。棄置今何歎。沈冥古所欽。鶴樓聞尙在。仙侶好相尋。予亦倦遊客。因今懷故林。

雨夜舟中

江村秋雨夜。落葉滿楓林。留滯孤舟客。蕭條歲暮吟。檣燈還自照。雲氣坐來深。忽憶滄洲趣。令人動遠心。

病中聞揚州寇報

海上氛祲蕩日長。羽書今報過維揚。正愁關塞多戎馬。况復江淮作戰場。未斷鯨鯢流海血。常從霄漢望天狼。干戈白首憐生事。臥病空山秋草黃。

春日

白下春來雲氣深。南天霧雨常陰陰。誰家歌鼓日爲樂。千里故鄉時在心。海雁如何獨不見。江蘼况復助悲吟。開門恰對長干曲。散步仍慙綠樹林。

望九疑

衡山杳靄接蒼梧。御氣龍華定有無。一望南荒悲帝子。傷心何處訪仙都。空餘斑竹淒湘浦。遺恨黃陵叫鷓鴣。煙雨楚天常不斷。祇愁雲散九疑孤。

沈鍊一首

鍊字純甫。一字子剛。會稽人。嘉靖戊戌進士。除溧陽知縣。改荏平。清豐。入爲錦衣衛經歷。坐劾嚴嵩廷杖。謫佃保安。尋爲嵩所陷。僇於邊。隆慶初。贈光祿少卿。天啓初。追諡忠愍。有青霞集十一卷。

四庫總目。鍊文章勁健有氣。詩亦鬱勃磊落。肖其爲人。

徐學謨世廟識餘錄。錦衣衛經歷沈鍊。以論嚴嵩父子。發口外爲民。編籍保安。鍊自負狂直。開書院。招四方遊士。議朝政得失。凡遇搢紳往來。必斥毀嚴氏父子。或時馳馬至居庸關下。南望戟手唾罵。繼以慟哭。又傳檄京師。欲起義以清君側之惡。是時趙文華既得罪。嵩父子疑懼。思以自保。會有人以鍊狀來告者。嵩父子懼。欲殺鍊以滅口。乃授指宣大總督楊順圖之。會大同告急。上日夜憂危之。而順方殺平民奏首功。蒙上陞廕者屢矣。獨畏鍊口不靖。則以貨遺之。冀密護其短。鍊一日遣順詩曰。殺生報主意何如。解道功成萬骨枯。試聽沙場風雨夜。冤魂相喚覓頭顱。順得詩。大懼事露。乘白蓮教起。乃搆鍊陷之於死。明詩選。陳臥子曰。青霞快男子。詩亦俊爽。

送徐縣博員繁昌

率檄出河濱。行看柳色新。一官甯足貴。五斗祇因貧。絳帳樽中酒。青氈馬上塵。故鄉雲樹近。早晚望慈親。

周怡一首

怡字順之。甯國太平人。嘉靖戊戌進士。除順德推官。擢吏科給事中。坐言事廷杖。繫獄得釋。尋復逮繫。大高元殿災。釋出。隆慶初。起故官。遷太常少卿。出爲山東僉事。改南國子司業。復詔爲太常少卿。天啓初。追謚恭節。有訥齋文錄十卷。詩錄九卷。尺牘四卷。雜錄三卷。

舟夜大風

歸程十日尙瀛洲。去國遲遲惜晚秋。野興耽人餘斗酒。客情隨處宿扁舟。江鄉此去無勞夢。險阻年來不解憂。一夜天風還誤喜。只疑吹到海東頭。

徐良傅三首

良傅字子弼。東鄉人。嘉靖戊戌進士。除武進知縣。徵授吏科給事中。以言事斥爲民。有愛吾廬集八卷。

田按黃門以迎仙宮成朝議稱賀。上疏忤旨罷歸。立身自有本末。詩澤古不深。而音節自亮。如危氏重貞堂詩。可以廉頑立懦。

危氏重貞堂

重貞堂在何許。阿姑與阿婦。辛苦世無侶。阿姑二十稱未亡。階前夜雨唳寒螿。誰知阿婦亦復爾。兩世六月飛嚴霜。姑語婦。黃口無存汝難守。婦謂姑。誓與阿姑骨同朽。共持寸鐵肝。各保千金軀。輝輝雙白璧。照耀人寰區。吁嗟薄俗難具陳。朝遊燕壘暮入秦。一生自詫長樂老。五世誰念相韓人。婦人立身不草草。何況七尺垂冠紳。吁嗟薄俗難具陳。

龍山雜言

虹石橋邊村巷。龍珠山裏人家。莫道仙源易認。春來處處桃花。

千金陂權歌

黃塘口外棹歌收。坐看巴華幾派流。疊鼓正翻獅子峽。鳴笳已近虎頭洲。

袁煒一首

煒字懋中。慈谿人。嘉靖戊戌第三人及第。授編修。歷侍讀。侍講學士。擢禮部侍郎。加太子賓客。改吏部。進禮部尚書。加太子少保。改戶部。兼武英殿大學士。典機務。累加少傅。兼太子太傅。建極殿大學士。贈少師。諡文榮。有集八卷。

世廟識餘錄。上著一猫在永壽宮。乃山西晉府所獻者。解人意。上極憐愛之。一日忽斃。以金棺葬之。萬歲山下。薦以齋醮。令諸臣撰青詞超度。禮部侍郎袁煒詞中有化獅作龍語。上極稱善。煒他詞妙麗奇詭。往往多巧思。出他詞臣表。寵眷特優。吳中布衣有王逢年者。客煒所。雅倩爲酬應古文。逢年恃才。信筆成篇。不加點綴。偶有屬草。大拂煒意。疏之。逢年投書門者。飄然辭去。書云。執事以時文發科。以玄文拜相。安知世有古文者。京師喧傳逢年書。以爲真煒之實錄。無不捧腹者。

野獲篇。世廟居西內。事齋醮。一時詞臣以青詞得寵眷者甚衆。而最工巧最稱上意者。無如袁文榮煒。董尚書份。然皆諛妄不典之言。世所傳對聯云。洛水元龜初獻瑞。陰數九。陽數九。九九八十一數。數通乎道。道合元始天尊。一誠有感。岐山丹鳳兩呈祥。雄聲六。雌聲六。六六三十六聲。聲聞於天。天生嘉靖皇帝。萬壽無疆。此袁所撰。最爲時所膾炙。他文可知矣。

冬夜院中齋宿

玉堂清接禁城陰。庭樹蕭蕭夜氣森。咫尺天南雲縹緲。瑤壇應候翠華臨。

萬虞愷一首

虞愷字懋卿。南昌人。嘉靖戊戌進士。除無錫知縣。徵授南兵科給事中。出爲山東參議。歷福建副使。貴州參政。進福建布政使。改山西。擢南右副都御史。徵拜刑部侍郎。有楓潭詩鈔。



鵝湖舟中卽事

八月尋幽偶泛槎。水邊茅屋有人家。家家兒女能蕩漿。爭入殘荷看晚霞。

蔣宗魯一首

宗魯字道父。普安衛人。嘉靖戊戌進士。除濬縣知縣。徵授戶部主事。歷郎中。出為成都知府。遷雲南副使。歷河南按察使。就遷布政使。以右副都御史巡撫雲南。有集。

田按。道父歷官有政績。其知濬縣。有嘉禾及蝗飛出境之異。濬人王瓚作頌及序紀之。按察河南。糾伊府之虐。置之法。巡撫雲南。定阿堂之亂。奏罷採石大理。立蘇民病。許仲貽寄蔣中丞詩云。吳門常記奉高談。別後逢人謝錦函。呂伯向時留陝石。孔明今日在滇南。內臺出鎮名元重。貴竹移家俗舊諳。柔遠暫勞調鼎近。獨愁無地盍朋簪。其為名輩推重如此。

碧雲洞

澗道風湍開遠巘。石門花霧帶平川。蓬瀛舊有神仙侶。對酌滄洲思渺然。

陳昌積一首

昌積字子虛。泰和人。嘉靖戊戌進士。授禮部主事。遷尙寶寺丞。兼翰林五經博士。有兩湖集三十四卷。

田按。王浚川數當時作者。江右有尹子。陳子。尹子為洞山。陳子則子虛也。子虛詩調瀏亮。惜不得其全集錄之。

湖興

水淨雙湖菡萏幽。卜居性僻愛林邱。長憑藥裹供多病。聊借書籤散亂愁。片葉得風隨澗水。孤花和雨泣蘋洲。故人厚祿書全少。惆悵空登王粲樓。

黃注一首

注字汝霖。信豐人。嘉靖戊戌進士。除長興知縣。徵授吏部主事。有集。

南野道中

山上蘼蕪綠未齊。山中愁聽鷓鴣啼。到來客路行無盡。纔過前溪更後溪。

楊載鳴一首

載鳴字虛卿。泰和人。大學士士奇五世孫。嘉靖戊戌進士。除潮州推官。徵授吏部主事。以事謫將樂典史。累遷廣東提學副使。召拜通政使。有大批堂集九卷。

萍鄉

故園煙樹渺蒼蒼。楚水巴山去路長。最是孤懷無奈處。亂峯殘雪度萍鄉。

王炯二首

炯字幼明。清平衛人。嘉靖戊戌進士。除南部知縣。遷興化同知。有閣齋詩稿。

點詩紀略。閣齋強仕投簪。泊焉自適。以風雅爲鄉里倡。好平越衛山水幽勝。習靜於高真觀。興國吳國倫贈詩云。不覩遺榮賦。

誰知好道心。巢雲開石室。采藥入青林。遂與世人絕。杳然仙路深。浮邱如可遇。吾意亦招尋。清平孫應鼈贈詩云。交臂每憐時。眼白。輸心惟對故山青。年年下詔求賢佚。誰識西南處士星。可以想其爲人矣。

耕隱

學道無成學老農。村居一徑野雲封。負鋤採藥尋仙去。知在隔江第幾峯。

茅坤一首

坤字順甫。歸安人。嘉靖戊戌進士。除青陽知縣。改丹徒。徵授禮部主事。改吏部。左遷廣平通判。遷南兵部主事。擢廣西僉事。進河南副使。有白華樓藏彙十一卷。續彙十五卷。吟彙八卷。玉芝山房彙二十二卷。老年錄七卷。

四庫總目。秦漢文之有窠臼。自李夢陽始。唐宋文之有窠臼。則自茅坤始。

盛明百家詩。蔡白石云。鹿門文勝於詩。

田按。唐宋八家文選。自朱伯賢始。明中葉未盛行。自唐應德。王道思。矯北地。剿襲秦漢之弊。順甫選八家文鈔。盛行於時。可稱好事。

叢山關曉發

山色秀可掇。良契遊子襟。涼雲寫曲澗。白日耀高林。竹間露猶泫。巖阿風乍沈。人煙互葱蒨。樵路仍嶮嶽。安得攜良朋。於此援鳴琴。拂衣一再鼓。山水揚清音。

莫如忠二首

如忠字子良松江華亭人嘉靖戊戌進士除南工部主事改禮部歷員外郎中出爲貴州提學副使中道投劾歸改湖廣副使歷河南參政陝西按察使浙江布政使有崇蘭館集二十卷

四庫總目如忠詩頗具唐音五言近體尤多佳句文則題跋頗爲雅令

明詩選陳臥子曰方伯名德羽儀詩多朴易

藝苑卮言如忠行草風骨朗朗亦善署書

畫禪室隨筆吾鄉莫中江方伯書學右軍自謂得之聖教序然與聖教序體小異其沈著逼古處當代名公未能或之先也予每詢其所由公謙遜不肯應及見右軍官奴帖真跡儼然莫公書始知公深於此

列朝詩集子良善草書詩尤工近體

卽事弔古

驛路紅梅始著叢春光將半未全融蓬扉曙色經冬雪麥隴餘寒盡日風殘劫有灰秦故國疏鐘籠月漢離宮古來無限興亡慨莫倚肴函百二雄

遊北禪寺

香界追攀十載曾薜蘿深處翠微扃齊梁古蹟餘雙樹水月玄心印一燈山鳥弄晴春冉冉閣雲凝碧畫冥冥投簪莫訝歸無侶猶有逢迎白社僧

周鯤一首

鯤字少魚莆田人嘉靖戊戌進士官江西副使有章林巖藏藁

闕陔詩話章崑以辨冤獄忤權貴罷歸隱章林山中澣衣箨冠從兩奚童策蹇衛蹻躡道中望之不知爲貴人精染翰片蹤寸縑人爭寶之詩亦饒風致

病起

世難逢多病年飢倍隱憂三旬長閉戶五月尙披裘戌鼓催城夜烽煙失麥秋有懷龔渤海兵甲散春疇

王崇義一首

崇義字子由淄川人嘉靖戊戌進士授刑部主事出爲甯波知府有見一詩稿

送趙露泉僉憲陝西

仙郎繡斧入三秦十月關城朔氣新鳴珮共憐雲署冷看花仍憶曲江春乾坤西北煩戎馬海嶽中原識鳳麟獨羨終軍正年少清朝未擬駐車輪

黃洪毘一首

洪毘字協恭莆田人嘉靖戊戌進士官江西副使有瞻雲集

送胡龍江歸浙

路歧看不盡。木落雁飛遙。別後相思夢。秋江幾暮潮。

林萬潮一首

萬潮字養晦。莆田人。嘉靖戊戌進士。官贛州推官。有贛州集。

寄陳少峯

燕子磯頭秋水生。鳳凰臺上暮雲平。相思一夜令人老。愁絕空林鷓鴣聲。

陳應魁一首

應魁字孚元。莆田人。嘉靖戊戌進士。官浙江副使。有梅山詩稿。

渡江

東風吹雨暗難開。更向茫茫海上來。日暮愁吟魂欲斷。鷓鴣嗁上越王臺。

符驗一首

驗字大克。黃巖人。嘉靖戊戌進士。授南福建道御史。謫建安知縣。累遷廣西僉事。有松巖遺稿。

林縣黃華寺

千峯萬峯積翠饒。遠水近水通溪橋。自憐不是神仙骨。空憶當年王子喬。

溫新一首

新字伯明。洛陽人。嘉靖戊戌進士。除行人。遷戶部主事。有《太谷集》二卷。

四庫總目二溫詩集。新與弟秀撰。秀游李夢陽之門。故詩多亢厲之音。新詩刻意學杜。而僅得浮聲。蓋亦宗北地之學者也。

### 習池

昔聞少陵詠。今過習家池。下馬穿幽徑。新楊滿地垂。青荷元自蓋。碧水暗通溪。謾有山翁興。何由醉似泥。

### 劉乾一首

乾字仲坤。唐人。嘉靖戊戌進士。官國子監丞。有《雞土集》六卷。

### 琴

靜聽七絃鳴。瀏瀏松風瀉。一彈明月來。再彈玄鶴下。

### 王健一首

健字偉純。永嘉人。嘉靖戊戌進士。授刑部主事。改禮部。歷員外郎中。遷南光祿少卿。有《鶴泉集》。

### 樂清道中

雨餘驛路靜埃氛。鳥弄清歌到處聞。山轉樹陰牽落照。江空帆影亂行雲。晴天四面樓臺出。勝地千重洞壑分。賸愛嚴亭堪把釣。洗心卻愧白鷗羣。

### 馬廷錫一首

廷錫字朝寵號心庵貴州宣慰司人嘉靖庚子舉人授內江知縣有漁磯集

黔詩紀略王文成謫龍場驛丞武陵蔣信道林走龍場受業楚中傳姚江學者道林得其真醇心庵鄉舉後一年道林以副使提學貴州學者翕然宗之而心庵爲之冠道林告病歸築精舍於桃花岡聚徒講學心庵謁選蜀令才二歲即投簪走桃岡卒業乃歸與清平孫淮海先生爲性命交構棲雲亭於會城南漁磯上靜坐其中爲箴以自警曰必極靜極清以至於極定始長覺長明以至於長存澈頭方了道入手莫言貧其勵志如此南方學者爭負笈請業漁磯棲雲間儼嗣桃岡之盛田按心庵與清平孫淮海思南李同野齊名郭子章撫黔走別鄒爾瞻江上爾瞻曰黔中孫淮海李同野馬心庵皆致力斯學惜君不及見耳子章輯黔記合三公爲理學傳姚江明儒學案於吾黔講學者皆置之不錄豈非缺典余欲輯黔人學案因錄心庵詩附著其論於此

山中吟

春陽律轉先深山村村花柳回彫顏鳥鳴高樹聲關關幾家煙火自村落春酒熟時相往還

劉熠一首

熠字元麗海鹽人嘉靖庚子舉人官監察御史有同春堂遺稿四卷

悲妓

十六彈箏學舞笙蝦蟆陵下舊知名而今絃調還如昔公子相逢不肯聽

程應登二首



應登、字思進。長治人。嘉靖庚子舉人。官睢州知州。改延慶。有棲霞集。

七月望日西寺晤一菴中甫

欽君一壺酒。蘿徑掩禪扉。說劍心何壯。談詩興欲飛。疏煙浮晚竹。涼月墮秋衣。坐久聞孤磬。泠泠思入微。

和李裕州送呂山人南還

新安何處是。雲水思依依。秀句囊中滿。孤帆天際飛。深山愁獨鳥。古木挂斜暉。遙憶煙波外。松蘿晝掩扉。

方興邦三首

興邦、字懋藩。莆田人。嘉靖庚子舉人。官廣西參議。有霽村集。

蘭陔詩話。霽村近體師法杜陵。沈著無弱調。

田按。懋藩官京曹時。與宗子相倡和。子相答懋藩詩云。念我遙傳清夜曲。開函半是白雲篇。頗致推挹。懋藩近體爽健。有唐賢遺韻。

慈仁寺重別孫四兄員外

昔年臨此地。杯酒與君期。怨別仍千里。重逢定幾時。岸明殘雪斷。山繞夕陽遲。獨上毘盧望。蒼茫倍有思。

得亨夫書

汝昔趨青瑣。批鱗有諫書。世情難共棄。古道竟何如。武騎功名薄。文園歲月虛。不知風雨後。誰過夕郎廬。

歲晚

歲晚風煙動。頻驚羽檄來。三吳仍寇盜。萬井半蒿萊。不見謝安起。其如庾信哀。音書久蕭索。更上望鄉臺。



明詩紀事卷二十一

戊籤

邢一鳳一首

一鳳字羽伯。龍江衛人。嘉靖辛丑第三人及第。授編修。歷侍講。進太常少卿。有雉山集。

登茅山

暮春三茅風日清。飛飛白鶴天際鳴。野人偶來得至道。老翁何處鉏黃精。華陽洞口青松古。錦石峯頭新月明。仰天倚劍發長嘯。不知身世在蓬瀛。

陸樹聲三首

樹聲

榜姓林

字與吉。松江華亭人。嘉靖辛丑進士。選庶吉士。授編修。歷南司業。左諭德。太常卿。擢吏

部侍郎。進禮部尚書。加太子少保。贈太子太保。諡文定。有集二十六卷。

筆塵。嘉靖數十年間。海內清望。平泉先生為第一。

國史唯疑。陸文定起大宗伯。江陵喜不俟其謁閣。即趨詣。猶以前輩事之。詞林禮數舊如是。未幾。陸竟致仕去。總性格非合。聞江陵宴陸。數易新衣。令人整刷鬚鬢。示更新從時宜意。江陵亦癡。奈何以浮榮嚇清節士。雲間志略。高新鄭在政府。遇事稍不當意。輒曰。吾不如陸平泉。

陳繼儒見聞錄。佘山慧日院佛像落成。徐文貞入山中奉世廟。欽賜蟒衣一襲。付僧圓實。因賦一絕云。單衣露冷宿曇華。誤縮宮袍傍帝車。拈向山門君莫笑。細看還是舊袈裟。丁酉。陸平泉八十有九矣。亦以衲衣一襲付慧日院。手書偈於衣之表云。解組歸來萬慮捐。盡將身世付安禪。披來戒衲渾無事。不向歌姬爲乞緣。此二事。東坡解衣留鎮山門。同一風流也。

顧京兆園居和莫方伯韻二首

端居嬰俗鞅。結思在雲林。擬並高人駕。還諧靜者心。屏虛山入座。徑密樹交陰。彷彿還迷路。幽尋不厭深。窈窕城隅隱。陰森灌木繁。地偏宜避俗。興愜自忘言。雲砌花陰覆。風階草帶翻。偶來淹勝賞。吾意亦邱園。

北禪雙樹

歲遠香臺半劫灰。斷碑遺跡掩蒿萊。回看雙樹聞僧語。此日清陰是再來。

陸樹聲禪林餘藻。馬嶠古刹。歲久漸圯。地爲居民侵蝕者半。獨殿前雙樹屹立。度僧臘無數。兵後官司取材議及焉。余護存之。他日過寺。寺僧是榮引余讀舊碑。出雙樹下。顧余曰。是木向微公。幾已化去。今清陰宛在。實仗再來緣。願一言貽山門。因題識廡壁。以戒芻牧。

田按。文定北禪小像軸。萬歷戊戌葉時芳寫。庭列雙樹。公坐樹下。一僧對坐。兩童子侍。公自題云。法林曾憶舊生緣。十載修成破戒禪。悟得本來真面目。爲渠拈出向人前。孫克弘題云。早持海印證禪宗。理窟同參引上公。千古契機誰得似。居然黃蘗舊家風。董其昌題云。男婚女嫁得團圓。九十餘年現宰官。若問師承在何處。門風壁立白雲端。陳繼儒題云。空門冷淡舊生涯。說法唯拈笑裏花。九十上公休脫錦。山僧看是破袈裟。又有章憲文。殷廷樞。蔡懋昭。蔡逢辰。陸應暘詩。此軸今藏余齋。

方逢時十五首

逢時字行之。一字兆行。嘉魚人。嘉靖辛丑進士。除宜興知縣。改甯津。曲周。徵授戶部主事。改工部。歷員外郎中。出爲甯國知府。遷廣東副使。改山西。進右參政。以右僉都御史巡撫遼東。改大同。進兵部侍郎。總督宣大山西軍務。進兵部尚書。加太子少保。總督如故。召理戎政。還部視事。加太子太保。進少保。有大隱樓集十六卷。

甌甄洞續藁。少保詩。才情美。音節調。其氣豪宕不羈。純乎唐音。

明詩統。金湖隨地隨事。皆有吟詠。隨詠輒工。古選摹曹陸。近體上下高常侍。劉隨州。

田按。尚書與王學甫力主款議。邊陲不受兵者數十年。世稱方王。然王得謚襄毅。而尚書謚典不及。考款議之成。新鄭江陵主之。及尚書還部。與江陵議不協。九疏乞休。去未逾年。江陵死。尚書歸十五年。訖未起用。以江陵鄉人故也。歿後。葬祭諸典缺如。至萬歷四十一年。尚書子日接疏請優卹。是時福清持閣柄。始許賜祭。賜葬。賜廕。而易名之典。終未許也。尚書早與吳明卿談詩。清婉動人。略無猛厲之音。

宿潞河驛

朝出春明門。暮宿潞河驛。寒日下平原。朔雲迷廣陌。行邁心靡夷。戚戚抱悽惻。王事日鞅掌。世途轉崎仄。元冬燠如春。黃塵翳天末。氣機信多訛。調燮豈乖術。真宰不可求。天閭九重隔。撫景一悲歌。長空羨歸翼。

南園歌

燕山冰雪春猶劇。對酒喜遇南園客。南園風物近如何。邀我爲作南園歌。玉壘天長春草碧。九河煙暝春濤急。陌頭楊柳隴頭雲。海上青山天上月。我昔曾向南園遊。鳥嘯芳樹花迷輶。美人垂手柘枝舞。伶兒促拍鷓鴣謳。別後風塵隔海涯。夢魂常傍玉仙家。歸時爲問灌園者。春到甘棠幾樹花。

燒荒行

漢家禦虜無奇策。歲歲燒荒出塞北。大磧平川絕鳥飛。漉漉龍庭暮雲黑。秋風蕭蕭邊草黃。胡兒牧馬乘秋涼。將軍令下促燒草。銜枚夜發何倉皇。邊頭路盡迷行迹。黃狐赤兔如人立。陰崖舉火各因風。烈燄夜照陰山紅。山頭突騎飛流矢。幾人還向火中死。白骨成灰散不收。慟絕胡天作冤鬼。東風吹綠舊根荑。乾坤回首又春歸。惟有遊魂歸不得。年年空逐野煙飛。

岔道

重關開八達。岔道擁孤城。寂寞三家市。羈危獨戍兵。雨露沙草長。風激石泉鳴。經略者誰子。猶題石上名。

驚秋

江表棲遲歲月流。荆溪風物又驚秋。清攢顧影憐孤鶴。飲啄忘機愧野鷗。盧橘洞庭香漠漠。蓴鱸鄉國興悠悠。由來楚客多悲思。臨水登山賦未休。

寄吳惟德尙寶

聞君久客西湖上。悵望停雲不可招。天竺暝鐘和雨聽。孤山晴色隔江遙。南塘夢草春多思。北谷鶯聲晚自調。白玉山中好泉石。謾教猿鶴怨蕭條。

上巳日過衡水

風雲黯淡過衡水。節物蹉跎感異鄉。淺渚迴流橫小艇。荒村社鼓鬧斜陽。霜繁碧草經春短。天遠歸鴻傍客翔。十載素衣半塵上。不知何處是滄浪。

再遊鉢池山次周水部韻

境入招提一徑微。參差臺殿散晴暉。客來山靜惟聞磬。僧定雲深不掩扉。象外煙花秋欲盡。水邊燈火夜初歸。浮生尙覺迷津遠。迴首東林愧鳥飛。

留別曹刑部、周水部、湯戶部

遨遊喜結天涯興。離別其如歲暮心。作賦共攀叢桂樹。扣舷獨唱度江吟。家鄰七澤孤雲遠。夢遶三洲落月深。酒盡沙頭催去鷁。不堪重聽塞鴻音。

九月二十九日莊居偶成

十日不到秋忽深。草黃木落何蕭森。菽粟已登場圃滌。鴻雁下集洲渚陰。誰家機杼響茅屋。何處壺觴來竹林。身謝樊籠心夷宕。拄杖曳屨時高吟。

粵王臺

中原不逐秦皇鹿。絕域虛驕漢帝才。紫蓋黃旗成草莽。蒼山赤水尙樓臺。徒聞几杖三朝錫。終見戈船萬里來。千古興亡君莫問。漫將花鳥醉深杯。

清江棹歌

古岸春回楊柳新。長淮冰泮碧粼粼。鳴榔捩柁揚州去。打鼓燒錢賽水神。

琵琶亭

流落天涯不記春。檀槽金撥欲成塵。空江明月相逢處。一曲相思總未真。

溪行雜咏

小舟搖曳溪橋畔。古寺荒涼草樹間。獨立翠微最深處。斜陽影裏一僧還。

汎襄江

襄江春水色如染。畫舫乘春取次過。芳草綠楊何限意。更無人唱大隄歌。

王崇古一首

崇古字學甫。蒲州人。嘉靖辛丑進士。除刑部主事。歷員外郎中。出爲安慶知府。改汝甯。歷常鎮兵備副使。陝西按察使。河南布政使。以右僉都御史巡撫甯夏。進兵部侍郎。總督陝西延甯甘肅軍。



務加右都御史。改總督宣大山西軍務。加太子少保。兵部尚書。總督如故。進太子太保。召理戎政。加少保。遷刑部尚書。改兵部。贈太保。諡襄毅。有山堂彙稿。

明詩選。李舒章曰。司馬意色閒整。殊有緩帶之風。

靜志居詩話。襄毅詩格聳高。橫槩自喜。然按之不無懦響。

庚戌九月將赴金陵。夜泊廬陽郵亭。聞虜犯近郊。

江上初收雨。嚴霜已渡河。漢兵聞出塞。胡騎竟如何。雁陣凌秋盡。笳聲入暮多。武陵遺曲在。慷慨不成歌。

### 萬士和四首

士和字思節。宜興人。嘉靖辛丑進士。選庶吉士。授禮部主事。改南兵部。歷員外郎中。出爲江西僉事。歷貴州提學副使。湖廣參政。江西。山東按察使。廣東布政使。遷應天府尹。未赴。進右副都御史。督南京糧儲。召拜戶部侍郎。總督倉場。改禮部。再改南禮部。召拜禮部尚書。以忤張居正謝病去。起南禮部尚書。不赴。贈太子少保。諡文恭。有履菴集十二卷。

靜志居詩話。履菴出荆川之門。詩派從其師指授。然荆川集中。罕存酬和之作。故履菴有姓名不挂。更何論之句。及督學貴陽。以後詩另入一格。荆川乃許之曰。讓汝出頭。蓋荆川初入館局。學初唐。晚年效邵堯夫。謂其天機自動。未免頽然自放矣。履菴雖宗擊壤而習染未深。觀其黔南諸作。頗有似柳柳州者。

田按。履菴督黔學。以愛士名。黔士苦貧。削竹爲簪。屑木爲香。績絲爲網。多自食其力。遇荒旱則菽水不足。履菴做晦翁社倉遺

意以贖金糴粟數十石積貯於官視諸生貧乏之差而多寡其數以散之不責其息豐年取其耗二十之一凶歲則緩其期士賴以濟又聘馬心菴爲諸生師其聘啟云先生顏似冰壺形如野鶴棄榮名而修性命脫凡近以遊高明寒潭見底占斷漁磯一灣明月當空坐破蒲團幾箇遂覺江山有主時將詩句傳神共扶名教願借高賢暫出精廬增光書院心菴爲陽明再傳門人時稱善教履菴論詩云乏探索之功尙鯁釘之體摘章摘句割截破碎比如越羅蜀錦寸寸而裂之又寸寸而縫之尙可以爲衣乎蓋爲當時摹擬者發也

舟中雜懷

幻世卽虛舟蕭然作遠遊。意齊鵬鷗適名爲觸蠻羞。初日寫孤樹長風破逆流。隨緣信有樂何處欲銷憂。

舟過壺頭雨至

雷送空聲雨不遲。蕩舟壺口杳何之。青山閱世自千古白鷺沒波無四時。氣候逼人秋索索風塵行役鬢絲絲。文淵信有男兒志臥看飛鳶也動思。

次答莫生韻

避人猶爲世驚猜。樗散何妨處不才。官政無心惟學圃病身如客強登臺。自扃草閣留雲住閒愛柴門傍水開。君欲問奇無一字空持新律扣關來。

晚歸山莊

因耽幽寂住山家。城郭歸來日半斜。林靜祇聞喧鳥雀詩成疑已帶煙霞。浮名謾逐蕉中鹿空影誰猜壁

上蛇。今是昨。非堪笑處。去年投賦弔長沙。

林懋和 三首

懋和字維介。閩人。嘉靖辛丑進士。選庶吉士。改禮部主事。歷郎中。累遷廣東布政使。有櫟寄雙臺二集。

田按維介詩婉轉清圓。是閩人成派。

銅雀伎

松柏西陵道。秋風日夜疏。粧成空自媚。歌罷怨何如。淚洒羅衣溼。魂銷玉座虛。還期席蟻日。猶得奉恩餘。

昭君怨

驕虜窺龍塞。佳人出鳳城。據鞍重飲恨。攬鏡更含情。沙磧春難度。穹廬夢易驚。儻令天漢重。敢論妾身輕。

宮人斜

春雲漠漠草如煙。無限香魂哭杜鵑。爲語蛾眉謾惆悵。絕勝青塚寄胡天。

謝東山 一首

東山字少安。射洪人。嘉靖辛丑進士。歷貴州提學副使。累遷右副都御史。巡撫山東。有近譬軒集。黔中小橐。

明詩統高泉子曾哀輯昭代律詩爲集所作亦冲雅可喜。

劍閣芳華集東山慷慨負奇博雅好古嘗得易酒法歸射洪造釀甚美蜀人謂之謝酒蜀撫軍饒景輝有詩云射洪春釀今仍在。一語當年重品題。獨有少陵知此味。也應隨酒入新詩。

田按少安督黔學時取貴州宣慰司訓導張道所輯貴陽圖經刪正之釐爲十二卷乞楊升菴爲序又輯明七律詩二十九卷其七星軒夜坐詩云酒酣抵掌青天月詩就揮毫白雪篇又哭楊升菴詩云昆明池上木蘭橈一幕青天映錦袍頗有豪氣。

哭楊升菴

金馬碧鷄吟未歇。風輪泡影思何玄。長空鶴馭華陽國。夜月神遊洱海船。

萬衣一首

衣。榜姓字章父。德化人。嘉靖辛丑進士。授南刑部主事。改北。歷員外郎中。出爲雲南副使。歷福建。

湖廣參政。福建按察使。進湖廣布政使。改河南。有萬子迂談八卷。

送何勳部謫江州別駕

風流佐郡復何求。直道如今卻罕儔。得失未須論塞馬。行藏聊且付江鷗。思家時夢芳洲草。戀闕遙登煙樹樓。廬嶽章江故鄉縣。春明送客使人愁。

雷賀一首

賀。字時雍。豐城人。嘉靖辛丑進士。累官右副都御史。巡撫四川。有雷中丞律選。

西行閒詠

遙望松臺愜素聞。鼎湖丹火尙氤氳。何時飲服金光草。羽駕追隨躡紫雲。

洪朝選一首

朝選字舜臣。同安人。嘉靖辛丑進士。累遷四川提學副使。歷南太僕少卿。遷刑部侍郎。有靜安稿十五卷。

筆塵。沈青霞鍊劾分宜十大罪。至呼為嵩制。世廟大怒。徙保安為民。鍊好譏刺邊臣。詰其隱匿。督府以下咸睡眦之。總督楊順。巡按御史路楷承分宜風旨。劾鍊論死。隆慶改元。鍊子襄上書訟。華亭柄國。故與順有卻。逮順。楷下吏論死。往順為御史。監南直試。華亭長子入試。取代。順發其狀。同事御史張某馳使先告華亭。得預為左右。貫不盡法。於是德同事御史而怨順。時順為分宜所用。不得報也。已而有鍊事。又數年。穆考即位。乃正其罪。順論死在獄。少司寇洪朝選者。華亭客也。又阿華亭旨。因順令死。時五月。越數日方奏。奏下已有齊桓之慘矣。後數年。朝選家居。為巡撫勞堪所劾。捕繫獄。縊死。天道好還。可為明誠。靜志居詩話。舜臣強直自遂。為勞堪羅織。斃之獄中。士林多為扼腕。時王道思。唐應德輩。銳意古文辭。舜臣雖不與。八才子之列。而實聯鑣並驅。道思與李中溪書云。吾鄉洪芳洲先生文。直得韓歐曾王家法。吾輩駁雜。視之有愧。其傾倒至矣。詩非擅長。

奉陪鍾龍潭推府祇謁文公書院。遂登眺瞻亭。戰龍松諸勝。

訪古來陪騶馭遊。層層危磴似登樓。亭前怪石字還倒。相傳有大石刻二字。曰曉亭。一日雷震石倒。字亦從倒。今蓋亭其上。巖下雙龍戰已休。舊有雙松名戰龍。歲久無存。帶雨山泉鳴滴瀝。吟風庭樹響颼颼。歸來清夢猶相繞。共歎高車不可留。

范惟一一首

惟一、字于中。松江華亭人。嘉靖辛丑進士。除鈞州知州。遷濟南判官。徵授工部員外。歷郎中。出爲廣東僉事。改湖廣。歷山東參議。浙江提學副使。河南參政。浙江按察使。江西布政使。召拜太僕卿。有太僕集。

挾瑟上高堂

趙女倚新粧。含顰緩上堂。徘徊猶按瑟。顧盼轉生光。初調凌宮徵。流徽引鳳凰。停絃且莫竟。只恐斷人腸。

龔秉德十首

秉德、字性之。濮州人。嘉靖辛丑進士。除鎮江判官。徵授南御史。出爲温州知府。遷湖廣副使。有幻集。

海岳靈秀集。鴻洲詩和粹。婉麗。藻思駿發。

田按。性之詩。音亮詞美。俞汝成百家詩。舍美而錄瑕。幾爲所掩。

晚發過真宮田九度澗歷玉虛巖作

捫石躡重巒。凌虛俯幽谷。登陟盡險艱。蒙茸穿水竹。潭古潛蛟龍。林深走麋鹿。激澗瀉潺湲。奇花吐郁馥。鬼斧伊誰運。鑿此仙人窟。華構嵌嶠嶽。飛簷懸突兀。恍披九華峯。疑入三天竺。石髓呈異香。瑤草抽新綠。

忽聞鳳簫聲。雲輶下廣陸。南嶺午鐘餘。西林暮景促。翩翩王子喬。邀我洞中宿。戀此玄境寂。願言謝微祿。  
紫府觀

地控神仙府。山藏太乙壇。雲飄羅洞溼。日射玉壺寒。瑤草清堪掇。石英秀可餐。至人何處所。寂寞九還丹。  
甘露寺

逶迤盤石磴。瀟灑度珠林。草帶南朝色。雲橫北固陰。波光縈戶溼。樹影落巖深。清磬泠泠發。方窺靜者心。  
江心寺次韻

諸天連海藏。孤嶼峙江濱。鶴立松門月。僧歸水上雲。觀空雙樹掩。談偈一燈分。豈獨耽禪寂。因之遠世氛。  
贈姚洞陽山人

畫舫青鞋幾慣曾。風江雲嶽是良朋。窮途十載常爲客。借宿雙林每愛僧。興極題詩攀玉壘。狂來貰酒度金陵。唐家麗藻推姚合。接武如君可並稱。

上元日同彭膳部遊觀音山

珠林香閣倚嶙峋。高棟危欄瞰水濱。爲客正當修禊日。逢君如對永和人。雨餘谷口迷青靄。春滿江頭見綠蘋。漫向名山誇勝迹。還憑苦海問通津。

白龍湫底靈巖

蹊回磴轉入雲深。古木蒼藤結午陰。煙浦疏鐘來遠寺。石門流水瀉高岑。山中逋客名黃綺。洞裏眞僧字道林。落日松濤響空谷。疑聞鸞鶴送餘音。

登山海亭

石勢參差一徑通。捫蘿遙望海天空。亭高下瞰扶桑日。野曠平臨太乙宮。雲起波濤飛几席。潮來風雨入簾櫳。行吟洞口青冥上。十二樓臺暮靄中。

過邯鄲有作簡董近淮同年

千里塵沙一騎過。邯鄲城古動悲歌。呂翁祠畔蒼苔合。趙武臺邊芳草多。無復美人調錦瑟。空聞俠客擁琯戈。漳河不共繁華沒。日暮東風起夕波。

江南春遊

風吹桃葉柳葉雨。折梨花杏花竹隴一灣春水。石欄幾處人家。

般邁一首

邁字時訓。南京留守衛人。嘉靖辛丑進士。除戶部主事。歷員外郎中。出爲江西參議。進貴州提學副使。改浙江。歷四川布政使。遷南太僕卿。改太常卿。進禮部侍郎。有山窗漫錄。

病懷



城闕秋生暑氣刪。空堂木榻對衰顏。簾前葉落常疑雨。樹裏雲過忽見山。朝隱暫隨朱紱後。心齋時住白雲間。湖南草綠浮鷗淨。愛爾忘機盡日閒。

鄭渭一首

渭、榜姓。字伯清。閩人。嘉靖辛丑進士。累官河南副使。有望川存稿。

鄖陽道中

漢川東下向鄖城。策馬朝來指別程。山色和煙青不斷。隔林飛出竹鷄聲。

陳時範一首

時範字敷疇。福州長樂人。嘉靖辛丑進士。累官雲南布政使。有世槐堂稿。

東南嶠外詩話。獅岡詩多伉爽之音。

鄴都懷古

漳河不作險。問鼎改稱都。東漢已銷歇。西陵還有無。金盤寒溼露。銅雀暮棲烏。莫作登臺賦。臺高思轉孤。

張鐸一首

鐸字鳴治。上元人。嘉靖辛丑進士。選庶吉士。改御史。有秋渠、海岱二集。

甯海諸山

候吏逢迎海日西。亂山寒色正淒淒。向來別館無人到。愁聽驚鳥繞樹啼。

王應鍾一首

應鍾字懋復。侯官人。嘉靖辛丑進士。選庶吉士。改監察御史。出爲河南提學副使。遷山東參政。有  
缶音集。

東林寺

清秋重喜過東林。惠遠遺蹤何處尋。入社人空流水逝。講經臺迴暮雲沈。疏鐘晝度長廊靜。芳草寒生廢  
殿陰。欲向夜深訊僧定。多慚塵迹雜禪心。

何孟倫一首

孟倫字慎明。新會人。嘉靖辛丑進士。除鄞縣知縣。改建甯。新昌。徵授戶部主事。歷員外郎中。出爲  
浙江提學副使。

長相思

洞庭天闊雁來遲。迢遞江南秋暮時。新題錦字光陸離。欲寄幽情無所之。長相思。心惻惻。楚水吳山杳相  
隔。青楓搖落曉鳥啼。風露泠泠遠空碧。

何遷二首

遷字益之。德安所人。嘉靖辛丑進士。除戶部主事。改吏部。謫九江判官。起南吏部主事。歷郎中。就遷光祿少卿。改北。再改太僕少卿。以右僉都御史巡撫江西。進右副都御史。總督漕運。兼撫淮陽。遷南刑部侍郎。革職閒住。有吉陽山房稿。

田按：遷遊南太學。爲湛甘泉講學弟子。嘉靖癸丑甲寅間。華亭與歐陽南野、聶雙江、程松溪講學於京師靈濟宮。學徒雲集至千人。丙辰而後。諸公或歿或去。惟華亭尙在。而講壇爲之一空矣。戊午。遷自南來。爲太僕少卿。復推華亭爲主盟。再興靈濟之會。盛有時名。及巡撫江西。人以爲附和。相嵩得進。厚歛以遺嵩父子。人言嘖嘖。嵩敗而遷以嚴氏黨罷矣。遷歸後。猶開席授經。里諸生高致中過遷講室。中懸分宜詩軸。致中濡筆題軸云：椒山已死洪塘謫。天下何人是介翁。今日登堂覽詩草。始知公度實能容。

偕省寮殷白野、萬兩溪、洪芳洲、塗任齋遊牛首山

牛山臨象緯。龍闕隱靈仙。形勝開吳苑。松杉識晉年。樓臺四天出。雲雨兩峯懸。偶共逃禪者。忘言到法筵。

磁州曉發

水落草初茁。沙暄花欲開。自憐江閣上。人共早春來。

董份五首

份字用均。烏程人。嘉靖辛丑進士。選庶吉士。授編修。歷中允。學士。入直西苑。擢禮部侍郎。改吏部。進禮部尙書。以事斥爲民。有泌園集三十七卷。

國史唯疑董份、王材、唐汝楫、白啟常國史列爲嚴世蕃私人，啟常致以粉墨塗面，供其歡笑，諸公或才學，或門第，均足自致通顯，失足匪人，坐身名俱敗，可爲後鑒。

田按：嘉靖二十三年，命吏部尚書兼學士嚴訥、禮部尚書兼學士李春芳、吏部侍郎兼學士董份俱直西苑，撰應奉青詞，尋嚴李入閣參預機務，董以給事中歐陽一敬論劾削職去。先是董爲考官，取妻弟吳紹中式，紹，吏部尚書吳鵬子也，爲御史耿定向所舉劾，吳、董各疏辯求罷，帝命鵬竭忠供職，份安心直撰，吳分宜黨也，董亦與分宜子世蕃往還，時嚴氏得罪，人言嘖嘖，董得世蕃二萬金，董雖供直西苑，帝終不能曲袒也。董歸後，以贊名爲有司持短長，鄉人緣閒起，數見凌奪，不勝悲憤，死時呼其子曰：「吾死無書吾故官，以白布三尺，題曰耐辱主人足矣，亦可哀也。」份詩五言有清致，爲何元朗所推。

贈何元朗內翰之南都二首

執戟余方倦，摛詞爾獨雄。人分兩都別，官爲陸沈同。長路多秋草，虛堂急暮蟲。更憐明月月，清影隔江東。  
載筆新供奉，承恩舊帝京。離宮通祕署，江水切蓬瀛。待問稱書府，高談謝墨卿。邇來聞紙貴，知爾賦初成。

四友齋叢說：余赴官南館，京師諸公贈行詩不下數十首，唯董溇陽五律最工。

送郡侯李君之建昌

高賢稱傲吏，建武本仙鄉。石室秦人洞，銅陵華子岡。地偏宜坐嘯，齋靜得凝香。時向仙壇畔，清泉獨引觴。

寄蔡子

驅馬出門去，自知心不閒。紅塵淹日月，青鏡改容顏。興盡客中雨，夢多江上山。良朋在茗水，歲暮閉柴關。

贈石林上人

上人棲息處。邱壑倚空門。石悟三生意。林開雙樹園。拂雲常獨坐。掃葉與誰論。一扣禪關裏。何知有世喧。

王材二首

材字子難。建昌新城人。嘉靖辛丑進士。選庶吉士。授檢討。歷官南太常少卿。有念初堂集。

玉菴太史謝官後重逢喜而有作

金馬早辭方朔詔。三山去傍赤城遊。扁舟獨往雲無定。綠酒相逢菊正秋。佳句自應塵外得。異書多向枕中收。卻愁丹鳳重霄下。驚散飛飛海上鷗。

遊山

松嶺筠關此重尋。層巒十日滯春陰。花經雨後紅初薄。水到潭心綠轉深。丹井細煙留絕壁。洞天香雨在疏林。興來不憚登臨數。燈火黃昏下碧岑。

許邦才十首

邦才字殿卿。歷城人。嘉靖癸卯舉人。授永甯知州。遷德府長史。改周府。有梁園集四卷。

滄溟集。殿卿新篇道上。但殿卿妙悟。求似卽止。不肯由所不似。以致其似。爲遠有所隔。

藝苑卮言。于鱗與子與書云。許殿卿海右集。屬某中尉爲序。不佞嘗欲畀諸炎火。乃周公瑕亦曰。是旣已不能禁其傳。然不可

以欺智者亦唯任之。

海嶽靈秀集。空石詩做于鱗。而氣格不逮。然于鱗詩多客氣。而空石溫厚或過之。

明詩選。宋轅文云。于鱗亟稱殿卿。其梁園集殊不稱。絕句差快意。

列朝詩集。魯藩觀燭曰。于鱗詩多客氣。而殿卿溫厚或過之。殿卿與于鱗相友善。著海右倡和集。因于鱗以聞於當世。今之尊奉濟南者。視殿卿直附驥之蠅耳。而齊魯間之論乃如此。

王士禛蠶尾續文。許殿卿少與滄溟倡和。齊名鄉曲。今梁園正續集詩。殊不足當滄溟下駟。

黔書。吾鄉許長史殿卿詩。風格近韓愈。縱橫跌宕可喜。余閱黔志。知殿卿曾謫官永甯。遂搜摭其在黔之作。得絕句四首。一。初至永甯云。風塵誰自料。花鳥故相猜。問是山東客。何由萬里來。一元日云。客中逢改歲。不解是何鄉。時見懸門帖。春風動夜郎。一。新添驛云。埜館孤燈半滅明。江壖月落夜潮生。無端鄉思三更後。聽盡瀟瀟風雨聲。一夜投山家宿云。西南蠻徼萬山隈。昔日誰教漢帝開。埜鳥常呼行不得。馬蹏那復夜深來。其言藹惻和平。得風人之旨。

靜志居詩話。殿卿如銳頭年少。騁獵平原。耳後生風。鼻端出火。長歌有云。長卿慕人千載前。何似與君俱少年。子雲慕人千載後。何似與君俱白首。爽氣殊倫。令張正言爲之。不過此也。王元美贈詩云。是時歷下李攀龍。往往道汝文章伯。乃卮言評詩。竟不之及。又夷之四十子之列。取舍似未公也。

### 神通寺

百里泰山陰。千年號寶林。諸天聞說法。初地問安心。古殿松聲合。長廊月色深。夢醒禪榻寂。清磬下雲岑。

### 舟中

客子常明發。霜天正寂寥。移舟星在水。解纜月隨潮。往事流波駛。歸心帆影搖。更堪聞過雁。蘆荻共蕭蕭。

于鱗宅送江山人

良夜琴尊興不孤。蕭然行色惜山湖。天涯芳草思公子。雪後春風戀酒徒。那惜十千共舉白。從來百萬判呼盧。河橋楊柳誰堪把。况復梅花正滿途。

盈口

三月北風怒。孤舟泊寒浦。鄉夢苦難著。瀟瀟滿江雨。

丁香花

蘇小西陵踏月迴。香車白馬引郎來。當年賸綰同心結。此日春風爲翦開。

秋夜楊娥歌

風捲秋聲不敢過。月波凝在碧天阿。那知千載韓娥後。又有楊娥一曲歌。

平原道中答于鱗送別

神京千里促行裝。一片離愁若箇長。三疊陽關萬行淚。春風處處有垂楊。

隋堤柳

泫水秋風著柳枝。長隄一望影參差。不知錦纜經過後。憔悴如今又幾時。

春晚城西卽事

花老春深風更顛。勝遊常負恨年年。不堪送客夷門道。落日河橋聞杜鵑。

送謝中丞東山歸射洪

六月江干冰雪涼。射洪春酒鬱金香。自從筇竹通西夏。漢使年年出夜郎。

劍閣芳華集。東山嘗得易酒法歸射洪。造釀甚美。蜀人謂之謝酒。

邵元善二首

元善字台山。普安衛人。嘉靖癸卯舉人。授嶧峨知縣。擢戶部主事。謫通州州判。遷涿州知州。被逮

獲釋。改辰州通判。超擢四川僉事。有賢奕稿。

黔詩紀略。台山所在有治行。嘉靖四十四年。吏部尙書嚴訥奏請破資格拔幽異。擢四川按察僉事。史載平湖陸光祖爲文選郎中時。破格擢廉能九人。下僚競勸。其一即台山也。普安諸邵。文譽噪一時。台山尤長詞賦。所著賢奕稿。西蜀陳宗虞爲之序。擬以元道州。可想像其風概。

田按。台山賢奕稿已不傳。予從明詩統獲詩二首。亟登之。

秋日懷弟

秋色臨芳甸。秋風入綺疏。那堪賦搖落。對此獨躊躇。命酒歌長夜。思家步短除。似聞雁聲度。斟酌待相如。

所思



擬向江南問卜居。題詩新報故人知。茅堂幽絕須鄰水。我欲先開洗硯池。

沈九思一首

九思字天啓。上元人。嘉靖癸卯舉人。有頤貞堂稿。

題顧寒松遺居

讀書人已往。荒址抱寒流。野雀行空案。秋螢入破樓。自甘泉壑老。不作子孫謀。依舊松風響。清名罕與儔。

向巒一首

巒字序伯。程番人。原籍上元。嘉靖癸卯舉人。官興國知州。有二淮稿。

金陵瑣事。向序伯中秋泛月云。風動魚龍吹沸浪。露寒蟾兔泣清秋。會仙樓云。逐江芳草自生態。遶陌繁花偏冶顏。

登下鍾寺

撥雲登峻嶺。古寺眺清秋。危磴苔封滑。虛壇草色幽。谷深鐘易響。石怪水爭流。蠟屐頻來此。僧房半日留。

趙邦彥六首

邦彥字元哲。東阿人。嘉靖癸卯舉人。有趙元哲集八卷。

田按。元哲五言。如花邊孤騎人。雲裏萬峯青。花風低燕雀。柳浪戲鳧鷖。川雨遙明滅。山雲乍有無。貧覺妻孥累。愁隨遲暮生。皆佳句也。

夕歸卽事

村晚催歸興。青崖一徑攀。荒山紅葉寺。野水白鷗灣。漁唱隔煙浦。僧來扣竹關。夕陽林影亂。冉冉數鴉還。

晚

石阜晚登眺。深秋草木稀。煙村一水隔。野浦亂鴻飛。松嶺日初暝。楓橋人暮歸。淒涼惟破屋。卒歲歎無衣。

夏日郊居雜興

野廟依叢薄。村巫禱歲豐。漁樵分徑出。鷄犬數家通。柳色孤舟雨。蟬聲萬木風。晚來伏社散。扶醉送山翁。

山寺

蘭若拱山巖。青冥盤鳥徑。夕陽山下村。隱隱聞清磬。

山屋

連山如翠屏。正對幽人屋。石洞飛白雲。時來檐下宿。

尋僧不遇

欲雨不雨天氣涼。野寺無人秋葉黃。松墀宴坐了無語。時有飛花點石床。

明詩紀事卷二十二

戊籤

金鑾十七首

鑾字在衡隴西人僑居南京有徙倚軒稿三卷

四友齋叢說南都自徐髯仙後惟金在衡最為知音善填詞其嘲調小曲極妙每誦一篇令人絕倒

金陵瑣事金山人鑾徐太傅園云楊柳晚風靜芙蓉秋水香悼梁姬云江梅空索笑園竹自成斑北河道中云歸鳥亂曬原上

樹夕陽多在水邊邨送李谷陽云客中候曉霜如月馬上逢春草似煙

列朝詩集金山人在衡詩風流宛轉得江左清華之致

帝里明代人文略風雅之會金陵盛者三在衡執騷壇牛耳者再謂之詩人耆宿不亦可乎

田按山人詩清圓瀏亮無當時叫囂之習詞曲亦是當家有蕭爽齋詞集惜少傳本

崇明寺答水雲禪師

野寺臨晴晝園花照暮春夕陽千樹繞芳草一江鄰有客來何處逢人寄此身遠公能好事頭白更相親

泊淮上

愁輕遊冶興老重別離情野戍寒更盡河橋春水生斷雲疏雁影殘月亂雞聲明發應千里蕭蕭過楚城

荆溪訪陳小峯

地僻煩歎遠。心閒花事多。園林無夙約。風雨有時過。子夜燈前曲。白雲行處窩。還聞賦招隱。叢桂近如何。

鼓城道中答程石川

野店賣春酒。村燈泊暮船。詎知千里外。重醉一樽前。寂寞問生事。飄零入去年。羈懷無所慰。相贈有瑤篇。

石湖

東風載蘭漿。二月下橫塘。芳草野湖碧。落花春店香。醉呼吳市酒。老作楚人狂。良會催遲暮。青樓尙理妝。

再過界首哭薛東山

湖上重來訪隱君。亭邊獨立見遺文。漫因白髮悲山簡。空對玄心憶子雲。失路煙霄元是夢。放形鷗鳥自爲羣。秋蕪萬井荒原隔。老淚無聲不可聞。

酬保定總兵招遊靈谷寺

半山蒼翠鬱森森。白日平鋪十里陰。扶醉出城便瘦馬。破忙移席就幽禽。草荒四壁僧堂古。花散千巖法宇深。幸託軒車附韋布。野亭春煖共追尋。

范東溪池亭命伎

秋堂列燭擁笙歌。夜燕傳呼出綺羅。明月照人千里共。涼風吹面五更多。從知故國虛松菊。爲報鄰塘老

芰荷不惜主人重。命酒吳姬緩舞欲如何。

清明客京口袁兩峯山樓值雨

他鄉逢節正淹留。海色江聲共入愁。南去煙花迷楚苑。北來風雨徧揚州。林深白晝長疑暮。春老餘寒半似秋。村酒有時來地主。野花無語對山樓。

牛首

先皇曾此駐龍旂。一夜空山擁六師。春鳥尙思巡幸處。野花不似樂遊時。遙聞寺外江聲落。倒見天邊塔影垂。若問南朝昔年事。廢原荒井有豐碑。

留別

重解西風柳下舟。雁聲只在海東頭。歌殘白苧青娥怨。賦盡江蘿楚客愁。秋水別來還泛泛。暮雲歸去復悠悠。流光欲遡天南北。遙帶銀河入斗牛。

新安道中寄懷諸舊友

故嶺重經楓葉凋。旅懷蕭索伴歸樵。冰霜在道無千里。肌骨侵寒已半消。石上亂雲隨馬度。樹頭殘雨逐人飄。翻思前夜溪亭別。窈窕清商酒一瓢。

春日辱企齋朱少府松窗徐公子見訪。未暇展待。且聞別有佳約。詩以答之。

遠承華蓋及衡門。日午相攜到日昏。白髮自應忘縣長。青袍誰復識王孫。更因夜月留何處。忍對春風負此尊。傳到城南賸佳麗。小詞翻出寄桃根。

馮少宰山莊宴集酬乃弟稚山上舍

沿市湖邊水漸平。煖風吹送落花輕。一春苦雨空嗚鳥。十日看山幾出城。席地放歌酬勝會。仰天長醉笑狂生。午橋舊有裴公墅。漫屬羣賢紀姓名。

有懷

悵望隔江雲。春來不見君。歌聲與流水。俱在夢中聞。

秋夕

閉戶盡消百慮。燒燈常到三更。山靜寂無人語。夜涼微有秋聲。

吳門

闔閭城外花如煙。洞庭山水連天。安得弄花綠水去。與君同上木蘭船。

湯珍四首

珍字子重。長洲人。以歲貢生除崇德縣丞。遷唐府奉祀。不赴。有小隱堂詩集八卷。

藝苑卮言。湯子重詩。如鄉三老入城。威儀舉舉。終少華冶態。

田按。子重七言斷句。楚楚有致。

穀日

人日纔過穀日來。冷雲陰覆姑蘇臺。春姿欲動梅羞澁。華髮相將歲暗催。憶別獨吟東閣雨。息機行翦北山萊。清歡不爲窮愁減。甕綠浮浮釀好開。

送蘇子升往萬川二首

荆門西去接夔門。三峽波濤不可論。一曲驪歌臨別酒。楚雲巴樹總銷魂。采石江頭芳草萎。蛾眉碛畔曉猿啼。扁舟穩泛桃花水。好逐春風訪灑西。

越溪柳

掠燕藏鶯覆碧潭。絲牽縷結弱難堪。可憐庾信多蕭瑟。猶想春風似漢南。

徐鱗六首

鱗字紹卿。吳人。有在笥集。

黃德水國華集。徐君採藻最早。享年最永。其詩貴華采。尙標致。經營用思。愈入愈深。點綴旣成。更務清朗。吟誦再三。眞賞自得。續吳先賢贊。徐鱗詩警絕有奇致。

列朝詩集。徐鱗初名陵。字少卿。慕李陵之爲人。跌宕自喜。挾筴遊建業。徧覽形勝。酒酣以往。援筆賦詩。感歎六代興亡之際。高歌長嘯。引聲出蕭寥間。視舉世無如也。

靜志居詩話。紹卿學詩於蔡孔目。而標格矜爽。所謂弟子不必不如師。  
田按。紹卿與皇甫子安兄弟遊。皇甫長於五律。故紹卿此體亦最勝。

將歸夫椒泊湖口作

咫尺胥臺路。風波滿渡頭。鶴情懸碧壠。蕙思協滄洲。柳暗藏歸渚。花深引去舟。白雲爲帶處。彷彿識仙邱。

遊南山循嶺東行稍窮幽勝

隴首酬華矚。寒山轉鬱葱。翳林難見日。靈穴易生風。帆影滄洲外。鷄聲綠樹中。何如石門興。雲臥趣堪同。

秋日山中寄溟甫

客鬢經秋短。離情向暮深。永懷拳馥意。一展涉江心。嶺宿同哀狖。林棲並倦禽。白頭誰故舊。感激爲君吟。

山家

山家日翠微。澹蕩挹清暉。溪水繞門綠。巖雲當戶飛。夕陽啼鳥盡。細雨落花稀。遲暮何知客。途歡便作歸。

寓竹堂寺溟甫攜榼見過

境外歡良晤。壺觴戀夕陰。暝雲沈碧殿。涼雨澹珠林。存沒悲前事。榮枯愴暮心。一樽仍自惜。惆悵別時襟。

春日登灣上水樓

清賞歡同調。聊成假日遊。暮窗紆翠岫。春檻抱滄流。蕪綠煙催暝。花寒雨作愁。紅芳坐來歇。登處且銷憂。



董難四首

難字西羽大理太和人有鳳唱集

田按楊升菴謫滇滇人與之倡和者有張禹山輩稱楊門六學士余謂皆不如西羽隱君也升菴贈詩云隱節盧鴻一詩名基毋三可謂玄賞惜詩不多傳

九鼎寺

片身凌碧落九鼎墮青層寶日烘猊座春風護象乘棧迷尋洞客雲貼補衣僧為款支郎宿晨炊借佛燈

玉局寺

杜鵑枝上春可憐杜鵑聲裏雨如煙萋萋滿目芳草碧杳杳一髮青山懸忽悲隴麥客遊次卻憶棟花風  
信前惆悵池塘綠陰樹驚心一曲南薰絃

居易錄董西羽常輯轉注古音著韻譜滇志列隱逸傳曾見其題玉局寺一詩風格宛似楊升菴

袞袞寺

塔影罨回波松聲喧五鬣石門竟不開秋露泣迦葉

點蒼山

極目望點蒼芙蓉插天闕下有百尺松上有千年雪

賈惟孝二首

惟孝字若曾。嵩盟人。有賸語。閒吟稿。

田按。若曾卽升菴詩所謂賈東晦也。音調清脆。是宋元人合作。

秋林

林塘秋色淨。疏雨夜來收。紅葉迷樵徑。青山落釣舟。靜逢康樂賞。閒稱少陵遊。有客分西爽。吟邊獨倚樓。

登螺峯四顧亭

傑閣危欄枕翠岡。天開圖畫引壺觴。人生能得幾時醉。世事可憐終日忙。雨過樹頭雲氣溼。風來花底鳥聲香。一春好景須尋樂。回首南橋空夕陽。此詩亦見王襄敏集。

張本七首

本字斯植。吳人。有五湖漫稿。

田按。斯植五言格意俱高。

家園秋夕

蓮芰屬秋暮。邱樊開華門。山風漱肌骨。潭月洗心魂。遠矚有不極。幽情誰與論。秋芳恰盈把。采采謝蘭蓀。

江邨秋暮

結宇靜堪適。鳴榔遙自歸。鴨依殘照集。鷗拂斷雲飛。纈綰蓴絲滑。香清菰米肥。溪翁對尊酒。風動芰荷衣。

太湖

於此目難極。凌之心渺然。澤吞吳越水。山浸具區天。雞犬波濤裏。魚龍日月邊。筆床吾所事。攜上紫溪船。

雨阻天池寺

花雨萬重色。甯無稽逸情。泉聞百竇出。雲看數峯生。佛子宣蓮偈。山童指藥名。黃精一飽臥。天半午風清。

虎邱秋夜

而我隱淪客。尋真白玉宮。林通江店月。樓得海帆風。蓴膩溪羹綠。糟香市酒紅。喜逢曇域士。攜手翠微中。

新春雨後石湖漫興

淡蕩弄雲水。青山成主賓。祇園鐘喚鳥。漁市鼓迎人。興發揚帆遠。愁消命酒頻。垂楊報春早。相對意俱新。

秋夜登閶門城樓

月白三吳晚。天青八月秋。芙蓉照江國。蟋蟀上城樓。海思飛雲亂。鄉心落葉愁。忽聞黃鶴笛。清夜重淹留。

傅起巖一首

起巖初名洪。字晉卿。更名後。字夢求。無錫人。有正峯集。

題戎王出獵圖

九月西風草木黃。燕山飛兔白于霜。闕支小隊穹廬出。更向天邊射雁行。

晏睿一首

睿字孚泉。新喻人。正德間欒城教諭。

寄西魯先生

西魯先生致不羣。呼童日日埽山雲。相思一夜難成夢。松外月來疑是君。

何陋一首

陋字天宿。大庾人。

遊亞東山題壁

山寺春深載酒遲。鳥聲猶在落花枝。瑯琊永叔醉能記。修覺少陵狂有詩。碧蘚坐溫敲句石。酡顏酌費聽泉危。等閒歸去墨莊晚。那得白雲明月隨。

蕭引鳳一首

引鳳字光儀。南昌人。正德間諸生。官攸縣典史。有望羊樓集。

江上

野漲茫茫浸白煙。蘆花只在釣船邊。漁家近日生涯好。網得江魚不賣錢。

潘城一首

城字子良天台人。

越中清明

去年寒食吳山頂。今日清明越水濱。把酒獨看沙土鳥。春風兩度客中人。

張軌一首

軌字行之壽州人。正德間諸生。授羽林衛經歷。改虎賁衛。有西泚遺稿。

遊古峽石寺

石磴盤空入翠微。竹林疏處見禪扉。雲封松頂鶴歸晚。草掩山蹊客到稀。百尺瘦藤懸峭壁。千年古塔下斜暉。方袍盡日閒無事。檐下穿鍼補衲衣。

丁玘一首

玘字式玉丹陽人。正德中貢生。官南靖知縣。

練水漁舟

晴湖澄若練。釣艇輕如葉。呼酒入菰蒲。收綸待明月。

國家圖書館



004759339



. 86

6